

TŠHWAHLELO YA UNITED STATES

 ...thato ya Morena go dilo tše itšego go direla mo dinakong. Re ile Denver, feela e se kgale, gomme re boile. Ke a dumela gore ke nyaka go bega, kopano: E bile ye nngwe ya dikopano tše kaonekaone ke bilego le tšona mo mengwageng. Re bile le nako ya go kgahliša. Ka tsela ye nngwe bonnyane ka godimo ga sekete bo neetše dipelo tša bona go Kriste, ka ntłe le bale ba ba amogetšego kolobetšo ya Moya wo Mokgethwa, ka ntłe le maswao le matete a magolo ao Morena wa rena Jesu a a dirilego magareng ga batho ka Denver. Re bile le tšhologelo ya go kgahliša, le go tla mmogo ga batho. Re thomišitše ka dikete tše tlhano, le go thoma. Gomme re bile le Mammoth Gardens. Gomme mo bošegong bja boraro, go be ebile go se ne sekgorba sefe go batho go ema ka lefelong. Re bile le nako ye bjalo ya go makatša, ya mašego a mahlano.

² Re tlogile fale, go ya Canada, mošemane le nna. Gomme re fihlile godimo ka dithabeng, gomme gwa tla ledimo la lehlwa. Ke a thanka le kwele ka lona, seyale moyeng sa lena. Gomme batho ba bangwe ba masomeseswai seswai ba hwile ka go lona. Gomme re be re kgakgetšwe ka go lehlwa lela lebaka—lebaka—lebaka la matšatši a mmalwa, godimo fale ka dithabeng. Gomme dikopano tša rena di fetile, gomme re bile, go bowa gae bjale, pele re tloga gape. Kafao re dumela tšohle tše di bile mohlomongwe bakeng sa thato ya Modimo, gore go tla ba ko—ko kopano ye kaone, se sengwe gape. O bile le se sengwe se lokologantswe bakeng sa rena seo re sa se tsebego.

³ Re sepela mohuta wa ka lefaseng la leswiswi, eupša re se ka leswiswing. Re no latela, bjalo ka ge Seetša se eya, gona re latela Seetša.

⁴ Gomme Tate wa rena wa Legodimong mohlomongwe o bile le se sengwe seo re sa tsebego selo ka sona. Go ka no be go bile le kotsi tsoko e letše godimo fale. Goba, gape, A ka no be a šoma go yo mongwe go mo tliša. Le a bona, Modimo a ka no šoma go motho yo mongwe ka mokgwa wola; O fetola setšhaba ka moka feela bakeng sa motho yo motee yola, go ba tliša ka gare. Gomme kafao re a tseba yohle e be e le bakeng sa letago le lebotse la Modimo. Gomme re Mo leboga bakeng sa yona, le go re bolokeng. Gomme go bile ba bantši, rena . . .

⁵ Billy le nna re thušitše go ba nametša, go bapa tsela le dilo boka tše, tša batho bao ba thutšwego le se sengwe le se sengwe. Eupša re fetile ntłe le bothata bjo itšego. Re tšwile tseleng gatee, eupša goo go bile feela lebaka la dinakwana di se kae. Gomme monna yo mongwe godimo fale, mo polaseng o theogile le go re tanyolla ka trekere. E no thelela; go be go redimoša kudu.

⁶ Gomme e bile ye nngwe ya dilo tše ba sa nkago ba ba le tšona lebaka la . . . ga ba kgone, batala ga ba kgone go elelwa ledimo boka lela, ka nageng yela, mo nakong yela ya ngwaga, Roundup, Montana. Gomme re be re . . . Re tseba gore e ka ba eng ya go ithaola ka mokgwa wola, Morena wa rena o bile le seatla sa Gagwe ka fale felotsoko. E be e le bakeng sa morero o rilego, go—go re lokela. Go re lokela, ke seo se bilego.

⁷ Gomme kafao ke leeditše Ngwanešu Neville, morago ga ge ke boile, gomme ke rile, “Ke ya go ba gae ka Lamorena. Gomme—gomme ge o ka rata go nna, go theoga gomme mohlomongwe go ba le sekolo sa Lamorena, gobaneng, go lokile.” Gomme ke rile, “Gona ke tla . . . gomme ke tla thaba kudu go fihla.”

⁸ O rile, “Gobaneng, kgonthe, Ngwanešu Bill.” O rile, “Ka mehla re thaba kudu go wena go tla,” ka pelo ye kgolokgolo ya go bulega le kamogelo, ka mokgwa woo. Gomme morago go e bea lenaneong la gagwe la seyalemoya, maabane. Kafao re leboga kudu bakeng sa dilo tšohle tše.

⁹ Gomme mosong wo, bjale, go beng Letšatši la Mme. Batho ba bantši, le tla kwa dithero tša Letšatši la Mme mogohle, le batho ba bolela ka mme, se ke naganago se a kgahliša. Tlogela seo go tirelo ka moka.

¹⁰ Mosong wo ke begile, gore, se—se sehlogo sa *Tšhwahlelo Ya United States*, seo ke nyakilego go bolela ka sona. E lego, ka kgonagalo le kwele kgašo ya seyalemoya sa lena, gomme le tla kwa bontši bja tšona lehono. Gomme go tla ba theroy a Letšatši la Mme, mohlomongwe, bošegong bjo ditirelong. Gomme kafao ke naganne, mosong wo, ke tlwa bega, “tšhwa—tšhwa tšhwahlelo.”

¹¹ Ke boletše go yona ka Denver, fa, e sego tlwa go tšwa go go batamela ke nepago go e fa mosong wo, ge Modimo a rata. Gomme, yona, bile le nako ya go kgahliša ka yona. Morena o nno šegofatša ka tsela ya go makatša. Go mohuta wa dinako tše dingwe go re fa . . .

¹² O swanetše go šikinywa feela gannyane nthatana, go lemoga se e lego mabapi le yona, a ga re, dinako tše dingwe? Gomme re a rapela gore Modimo o tla e dira.

¹³ Gomme, galego, godimo fale, ge re feta . . . Banna ba Kgwebo ba Denver ba be ba le bona ba thekgilego ka mašeleng kopano, gomme e be e le mothekgi wa go fapano go feta nkilego ka ba le yena pele.

¹⁴ Gomme ka mehla, badiredi, ge ba thekga kopano, o tla re . . . “A le e begile?” “Ee, go kereke.” Yeo e no ba mabapi le yona. Bao ke badiši; ba nyaka mohlape wa bona go tseba ka ga yona. Leo e no ba lentšu le lebose. Yeo ke taba ya bona.

¹⁵ Eupša Banna ba Kgwebo ba be ba fapano gannyane. Ba nyakile lefase go tseba ka yona, kafao ba no neela e ka ba dikete

tše tharo goba tše nne tša ditolara tša boleng bja kwalakwatšo go dikoloi mokgotheng tšohle, dikolointefe, dipampareng tšohle tša dikoloi, le mogohle. Re bile le nako ya go makatša.

¹⁶ Ka morago ga tirelo e fedile, ba mpileditše ka thoko, ba rile, “Ngwanešu Branham, re ka go direla eng bjale? Re go kolota eng?”

¹⁷ Ke rile, “Gobaneng, ka nnete, ga se gona.” Ke rile, “Ga le nkolote selo.” Ke rile, “Lena, lefelelang sekoloto sa ka sa hotele, tlase fa, ge le duma.”

¹⁸ “Oo, re nyaka go go direla se sengwe.” Gomme ba be ba ka se... Ke be nka se tšee selo go bona.

¹⁹ Kafao molaodi o mpileditše tikologong. O rile, “Ke dumela o mokgwa wa go rata go tsoma le go thea hlapi, a ga a?”

O rile, “Ee.”

²⁰ Kafao yo mongwe wa borakgwebo o bile le polasa godimo fale, gomme o rile, “Ke tla no mo direla mpho ya seo.”

²¹ Gabotse, Mna. Moore o ile godimo go e bona. O be a swanetše go ya morago e ka ba dimaele tše masometlhano, ka godimo ga pere. Ke rile... Mna. Moore o rile, “Ke tla rata go bona Kgaetšedi Branham a dutše godimo ga pere, a eya morago go yeo.” Kafao o, bona, gomme...

²² Eupša, morago ga fao, le ge, ba ile godimo fale go lefelo la legae ka Silver Plume, Colorado. Ye e swanetše go ba ka lehlakoreng le bjale. Gomme ba rekile polasa ye nnyane godimo fale, le go beeng legae la kamora tše tlhano godimo fale bakeng sa ka bjale go... ka Silver Plume, Colorado, e lego thwi ka pelong ya dithaba. Kafao, lena batheahlapi, ke a thanka ke nako ye botse, kafao e tla ba lefelo le lebotse go itapološa, le ge ka morago ga dikopano le dilo, ge Modimo a dumelela. Ke go ya ka Yena, le a bona.

²³ Ke duma bjale go gogela šedi ya lena go Lentšu. Gomme ke no rata Lentšu, Lentšu la go phela la Modimo. Ke, ka gare ga Lentšu go Bophelo. Bjale, “Lentšu, leletere, le a bolaya, eupša Moya o fa Bophelo.” Gomme Bophelo bo ka Lentšung, gobane ke Lentšu la Modimo. Bophelo bo letše ka Lentšung la Bjona.

Boka ke go boditše, “Ke go fa...”

²⁴ O re, “Ke swerwe ke tlala, mosong wo, Ngwanešu Branham. A o ka mpha ditolara tše tlhano?”

²⁵ Ke tla re, “Ke tla dira.” Bjale, go no ba bophelo bjo bontši ka go seo boka go le ka tshepišong ya ka.

²⁶ Ke tsela ya go swana go lego ka Modimo. Ge Modimo a tshepiša e ka ba eng, gona se Modimo a lego, ya Gagwe... O swanetše go ba ka Lentšung la Gagwe. Le a bona? Lentšu le ga le lekane... Lentšu le le no swana le Modimo. Ke Modimo.

²⁷ Lentšu la gago ke se o lego. Ke setlamo sa gago; re be re fela re e bitša. Setlamo sa gago ke lentšu la gago. Ge re ka se tsee lentšu la gago, gona nka se be le tshepo. Eupša ge nka tsea lentšu la gago bakeng sa e ka ba eng, gona ke tlhompho ya monna.

²⁸ Gomme Beibebe e rile, “Mathomong go bile Lentšu, gomme Lentšu le be le le Modimo, gomme Lentšu le be le le Modimo.” Le a bona? Le a bona? “Gomme Lentšu le dirilwe nama, la dula magareng ga rena.”

²⁹ Ge re ka nagana, le, lona lefase re phelago go lona, mosong wo, ke Lentšu la Modimo. Mohlare *wola* ke Lentšu la Modimo. Le wena, mmele wa gago, ke Lentšu la Modimo. Modimo o o boletše go beng gona ka mokgwa wola, o o dirile go tšwa go lefela; go sego gwa ba le selo.

³⁰ A le kile la lemoga bophelo bja motho, moo bo tšwago gona? Sele e tee ye nnyane, ye nnyane kudu gore leihlo la motho ga le kgone go e bona; feela ka ye kgolo, galase ye maatla. Gomme go tšwa fale go tla wa lekgolo le masometlhano, monna wa boima bja makgolopedi. Bo be bo etšwa kae? Le a bona? Modimo o nno o bolela, gomme o nno thomega, ka tlhago, go gola, gomme fale o tšweleditše feela tlwa. O boletše mohlare wo mongwe le wo mongwe, se sengwe le se sengwe, go beng gona. Gomme e no ba sa go kgahliša bjalo, selo sa go kgahliša, mosong wo, go boga Lentšu la Modimo.

³¹ Bjale, ye, mosong wo, ka Testamenteng ya Kgale, go retologeng go Dikoronike. Ke nyamišitšwe gannyane nthatana . . . Ge le sa retologela go Dikoronika, tema ya 18. Go no lapa gannyane. Eupša ge Morena a rata . . .

³² Ga ke ne kgonthe; re tla tseba bontši Laboraro bošego. Ge eba Morena a rata, gomme kereke e ikwela go hlahlwa ka tsela yeo, ke tla rata go ba le Laboraro, Labone, Labohlano, Mokibelo, le Lamorena, bjalo ka tsošeletšo fa, feela tsošeletšo ya go ruta go tšwa Lentšung. [Phuthego e re, “Amene.”—Mor.] Laboraro, Labone, Labohlano, Mokibelo, le Lamorena, feela go ruta go Lentšu; e sego ditirelo tša phodišo, eupša go ruta. Mohlomongwe Morena o tla re hlahlela tseleng yeo. Gomme gona re . . . Ke no rata go ba le lena le go ba le kopanelo go dikologa Lentšu, le lena. Ke a le leboga, kudu kudu, bakeng sa yela ye kaone, ya go kgahliša “amene.”

³³ Bjale, ka go tema ya 18 ya Dikoronike, le go thoma ka temana ya 12, re dula go thea dikgopolo tša rena, feela bakeng sa nakwana ye nnyane ka go taba ye bohlokwa ye ya letšatši. Tša Pele Koronik- . . . Goba, Dikoronika tša Bobedi, ntshwareleng. Dikoronika tša Bobedi 18:12, gomme re tla bana karolo ya yona fa, le go bona ke eng Morena a tla bago le rena go se tseba.

Gomme motseta yoo a ilego go bitša Mika o boletše le yena, a re, Bona, mantšu a baprofeta a bega tše botse go

kgoši ka go kwana go tee; anke lentšu la gago kagona, ke a go rapela, le etše la bona, gomme o bolele tše botse.

Gomme Mika o rile, Bjalo ka ge MORENA a phela, ebile se Modimo wa ka a se boletšego, ke seo ke tla se bolelago.

Gomme ge a tlide go kgoši, kgoši o rile go yena, Mika, a re ka ya godimo go Ramotheegiliade ntweng, goba a re tla lesa? Gomme o rile, Rotoga, gomme o atlege, gomme ba tla gafelwa ka seatleng sa gago.

³⁴ Bjale, go thea kgopololo ya rena lebaka la dinakwana di se kae; feela lentšu le tee go Yena gape, go ye.

³⁵ Tatewešo wa Legodimong, ka dipelo di tletšego tebogo re a Go batamela gonabjale, legatong la disoulo tše di lahlegilego, legatong la bale ba ba hlokago, legatong la kereke. Gore, anke Moya wo Mokgethwa o tsene ka Lentšung ka pela bjale, re a rapela. Le tseele thwi ka go otologa go pelo ye nngwe le ye nngwe fa yeo e hlokago. Gomme ge A aba Molaetša wa Gagwe wa maatla wa Lentšu ka pelong, anke bohole re atlege ka Ona, mosong wo; go yeng, go tlogeleng tabarenenekele, ba hlalala le go tumiša Modimo, ba re, “Dipelo tša rena di a swa ka teng ga rena, ka lebaka la Bogona bja Gagwe.” Gobane re e kgopela Leineng la Gagwe. Amene.

³⁶ Lefelotiragalo la rena le a thea, mosong wo, go ya mahlomolapelo. Gomme Testamente ya Kgale, go nna, ka mehla ke morithi goba—goba pontšhopole ya Testamente ye Mpsha. Makga a mantši, yo mongwe o rile, “Ngwanešu Branham, gobane ka mehla o tšea Testamente ya Kgale? Go nyakile ka mehla, go tšeeng sehlogo, o tla ya morago go Testamente ya Kgale.” Ke e dira ka gobane ke rata bokai. Ke rata . . .

³⁷ Thuto ya ka e fokola kudu, boka bohole ba tseba. Gomme tsela e nnoši yeo ke tsebago go beng felotsoko kgauswi le nnete, ke go bona se phethene e bilego, go lebelela go tšwa polaneng le go bona e be e le eng. Gomme gona ke a tseba se *selo* se bego se le se tla ba se sengwe sa go swana go se se se lego fa, gobane e no ba moriti wa sona. Gomme ka mehla ke lebelela morago go Testamente ya Kgale go bona se bana ba Israele ba se dirilego, go bona se kotlo ya sebe e bilego, go bona se toka ya baprofeta e bilego, go bona se dilo tšela tšohle di bilego; gomme gona ke tla ba le kgopololo se se fa se lego, se se bontšhitšegopele se se tla bago ka go mafetšo a kakaretšo mo bofelong.

³⁸ Nakong ye, go bile le selo se segolo se diragalela Israele. E be e le leswiswing la bošegogare bja yona.

³⁹ Ka go Testamente ya Kgale, ge Morena a rata, mohlomongwe ka go ditirelo tše di tlago, ke tla rata go bontšha ka fao Mabaka a Phuthego tše Šupago a kailwego ka go Testamente ya Kgale. Ka fao ba thomilego feela tlwa boka mo ma—ma mathomong a Mabaka a Kereke a kereke ya Bantle, gomme ba ile thwi go theoga lebaka la go swana la leswiswi, le go tšwela ka go nako

ya letago ya Pentecost, mo go falaleng ga Moya wo Mokgethwa ka go kereke ya pele ya...ka go lebaka la Bajuda. Morago go yeng go kgabola sekgala se sengwe sa kereke ya Bantle, go kgabola lebaka la leswiswi, gomme morago go tšweleng gape ka go Mileniamo, mo bofelong.

⁴⁰ Bjale, ka fao gore morago ka go mengwagakgolo ya magareng fale, kgoši ye kgolo ye Ahaba o tlie maatleng. Gomme o be a le mohuta wa go sepela go botsebaleging bja dikgoši tše dingwe tša Israele, a bego a le...Ahaba, yenamong, o be a le mohuta wa mo—mo modumedi wa mollwaneng. Ke fela ke bolela ka yena ka mokgwa woo, gobane o be a le karolo ya nako go lehlakore *le* la legora, karolo ya nako ka go lehlakore *lela* la legora.

⁴¹ O ka se tsoge wa tseba o eme kae, monna yoo a sa tsemago ka mokgwa wola. Goba, motho yoo a ipolelago go beng Mokriste, gomme a sa tsemago, ga o tsebe o dire eng ka motho. Lehono ke bona Mokriste; gosasa ga o tsebe ba go kae. Ka kerekeng lehono, ba a hlalala le go opela le go tumiša Modimo; gomme gosasa, ntle ba enwa, ba tagwa, ba kitima tikologong. Gona mohuta woo wa motho o boima go dira e ka ba eng ka yena.

⁴² Ke elelwa, bjalo ka mošemane, nkile ra ba le pe—pe pere ya kgale, yeo e bego e dula e taboga magora nako yohle. Ke a thanka bontši bja lena banna, ba mengwaga ya ka, le tla tseba morago ka matsatsing a pere, matsatsi a dikarikana. Ke tlie makga a mantši, thwi go theoga mokgotha wo fa, ke otleta pere le karikana, nnamong. Ke masomenne tlhano. Kafao, bona...Ke a elelwa, pere ya kgale ye, re be re tla bea lejoki molaleng wa yona, boka o tla dira kgomo, go mo thibela go tshela legora. Gomme o tla taboga, golebjalo. Gomme o tla lekeletša lejoki lela gomme a retologa, le go ya pele. O tla tshelela ka kua ga legora. Gomme letšatši le lengwe, se a...

⁴³ Ke maketše ke eng e bego e goga šedi ya moisa yola wa kgale. Gomme go be go le mokoti wo mogolo wa go phohlomela tlase fale. Bjale, o be a eme ka go leobanare, oo, godimo, eupša o nyakile... Go be go ne mahlare a mangwe a bjang bja serapania ka go mokoti wa go phohlomela. Gomme o tshetše legora lela gomme a tsena ka mokoting wola wa go phohlomela moo metato le digalase tšohle tše, moo re bego...ka go bolahlelatšila bja rena—bja rena, gomme a tsena ka fale go hwetša mothamo o se nene wa bjang bjola bja serapania. Gomme re ile ra swanelia go hwetša dipere tše dingwe tše ntši le go mo goga go tšwa mokoting wola wa go phohlomela. Ge a tsene ka fale, o lekeleditšwe godimo. Gomme o eme ntle fale, o be a thothomela le go tšwa madi, gomme—gomme o be a le bjang, go hwetša mothamo, goba ye mebedi, ya bjang bjola bja serapania, ge a be a eme ka go leobanare, go nyakile go fihla dikhurung tša gagwe.

⁴⁴ Ke be ke fela ke nagana ka seswantšho sela. “Tsela ya mosenyi ke ye boima.” O no se dule go iketla moo a bego a eja le go ba le nako ya go kgahliša, eupša...o ile a swanela go tshela legora le go ya go gobala le go segakwa ka mokgwa woo, feela go hwetša mothamo wa—wa bjang bjo bongwe bja mohuta o mongwe. Bjale, seo e nyakile go no ba ka tsela ye batho ba dirago, bao ba tshelago legora la phulo ya Modimo. A ga le dumele seo? [Phuthego e re, “Āmene.”—Mor.] O ya ntle, o ya ntle lehono; o tsena ka gare. O ka kerekeng, a ne nako ya go kgahliša; morago, gosasa, o rekiša bakeng sa se sengwe boka seo. Go e dira boima kudu.

⁴⁵ Ahaba o be a le bontši goba bonnyane mohuta wola wa motho. Tsela ye nngwe le ye nngwe phefo e foketšego, Ahaba o bile le seila ya gagwe e beilwe, ge eba e be e le ka lehlakoreng *le* goba lehlakoreng *lela*. Lenyalo la gagwe le mo hlakahlakantše, le mosadi yo monnyane a bego a le mohumagatšana yo monnyane, morwedi wa kgoši, Isebele. Yo mobotse kudu go mo lebelela, mosadi yo mobotse kudu, eupša ka pelong ya gagwe o be a le yo mobe. Gomme o be a le morapelamodingwana, gomme o hloletše Israele yohle...

⁴⁶ Bjale, nka rata bjang go hlwa fale feela lebaka la metsotso e se mekae, boka go bile, ka go tseneng ka go kgwekgwe ya se go bomme, le a bona, fale. Gomme ge monna a thoma go nyala; mohuta wa mosetsana, mosadi yoo a... Ke bontši go fetiša feela go lebelela bobotse. O swanetše go hwetša yo mongwe, bobedi soulo le mmele di tšoenne mmogo; yo mongwe yoo ka kgonthe a yago go ba mogwera le mokgotse wa gago, yoo a tla go kgoramelago go kgabola maemo ohle.

⁴⁷ Bjale, eupša, Ahaba, o nno mo rata ka gobane o be a le botse, ke a akanya, le go nyala. Go ka se be selo ka ga yena, ka lebaka la, sehlogo bjalo ka ge a be a le. Gomme o tla godimo fale. Gomme morago, nnete, go tataganeng le yena ka tsela yela, le go mo rata, gabaneng, o hloletše Israele yohle go dira sebe le go ya kgahlanong le Modimo, le go phušola dialetara tša Modimo; go aga dialetara tša Baali. Gomme ba bile le thapelo ya Baali gohle go kgabola Israele, mo nakong.

⁴⁸ Bjale, mosadimogatša wa gagwe o hloletše Nabote wa moloki... Ba bantsi ba lena le badile ka ga gagwe. Ka fao a tšerego serapana sa gagwe, ka bofora; a ena, maaka, gomme o bile le dihlatse tša maaka kgahlanong le yena. Ka gore, o nyakile go direla monnamogatša wa gagwe se sengwe; gomme o bolaile monna wa moloki, gore a hwetše serapana seo se hlomaganego kgauswi ga naga ya ka mošate.

⁴⁹ Tšohle tše, Modimo o be a lebeletše tlase. Kafao moprefeta, Eliya, a bego a le yo mogolo, mohlanka yo maatla wa Morena, o profetile gomme o boditše Isebele se se tla mo diragalelago. Gomme o boditše Ahaba gore dimpša di tla latswa madi a

gagwe mong. Bjale, ge Modimo a boletše e ka ba eng . . . Nnete, matšatšing ale, Lentšu la thwi la Morena le tlide ka moprofeta.

⁵⁰ “Modimo, dinakong tša kgale le ka mekgwa ye mentši o boletše le botate ka baprofeta, mo letšatšing le la mafelelo ka Morwa wa Gagwe, Kriste Jesu.”

⁵¹ Kafao, *Le* ke Lentšu. Gomme ge eba e ka ba eng e le kgahlanong le *Leo*, e tlogele. Le a bona? Bjale, ka go latela, O bolela lehono ka moprofeta, mmoni, le go ya pele. Eupša sa pele ke *Le*, Lentšu. Bjale . . .

⁵² Gomme Ahaba o be a dirile bobe bjo. Gomme o ile pele; Modimo a šegofatša batho lebaka la mengwaga ye mentši. Gomme, mafelelong, Josafate o bile kgoši godimo ga Juda, mola Ahaba a bile kgoši ya Israele.

⁵³ Gomme, gona, Josafate o be a le monna wa moloki. O be a le morwa wa Asa. Asa o be a le mo—mo monna wa moloki, gomme o phušotše dialetara tšohle tša—tša medingwana; a aga dialetara tša Jehofa. Gomme bona ba ne tso—tso tsošetšo, boka e bile, godimo ka Juda.

⁵⁴ Gomme gona morago ga nakwana, Josafate, goba Ahaba a ke re, o rometše, gomme o hweditše seripa se sengwe sa naga, ka Siria, seo a nagannego ke sa gagwe, seo a nagannego o tla ya go se tše. Kafao o kgopetše Josafate yo ge eba o tla tla le go dira sekgotsi le yena.

⁵⁵ Gomme, nnete, go ne kotsi ye kgolo bjale, le a bona, ge ba bone kgoši ye kgolo ye, Ahaba, tlase fale, gomme ba bone yo mogolo yo godimo fa, Josafate; yo mongwe wa bona, yo bolelo; yo mongwe, monna wa go tlala Moya. Šetša ka fao o dirago sekgotsi. Šetša se o se dirago, ka fao o itlemago wenamong le basedumele. Ipoloke o hlwekile, gagologolo mo letšatšing leo re phelago.

⁵⁶ Ke a dumela, kereke, ntle le tlhasana ya pelaelo, se se tshumile ka pelong ya ka. Ke ka lebaka leo ke lebeletšego bakeng sa mašego a mahlano a, ka pejana; gapegape go, pele go direga, go fa kereke ye go hlahlamollwa ga go tsenelela, ka Beibele.

⁵⁷ Re phela mo merithing ya nako. Go ka direga nako e ka ba efe. Ge re bona dinako di etla bakeng sa dilo go direga; bjona bobe bja lenaba, ona maatla. Re lebelela madimo a leswele a le se sengwe le se sengwe se direga, dinkhu tšohle tše, dilo tšohle tše go fapana. Tšohle di hlotšwe ke ditsenatseno tše, tše go thuntšeng dipomo tše le dilo. Ba dira dilo tšohle go hlakahlahana. Gomme ba šunyašunya ka laborating ye kgolo ya Modimo, go phethagatša Lentšu la Gagwe. E ya go direga.

⁵⁸ Kafao, “motho wa sebe” a tsoga, maatla, go fora kudu. Nna. Ke kwele modiredi mosong wo, monna wa go tlala ka Moya, a tše leswao la sebata gomme a bolela gore molwalekriste ke Russia. A phošo. Uh-huh. Russia ga e ne selo go dira le

yona. Aowa, mohlomphegi. Seo ke ka Mangwalo. Bjale, eupša hlokomalang nako ye kgolo ye yeo re phelago, tshebotšo.

⁵⁹ Bjale, Josafate yo, go ikweleng mohuta wa gabotse gobane kgoši ya kgolo ya Israele e rile, “Etla, nketele.” Gomme o ile tlase fale. Gomme ba tšere pholo le nku, le go ya pele, ba dirile sehlabelo. Nako yohle, ka pelong ya Ahaba tlase fale, o be a le mofori, gobane o be a sa rapele yela . . . goba go neeleng dinku tšela le dilo ka pelo ya go rereša, gobane, morago ga tšohle, o itshamile go bodumedi bja mosadimogatša wa gagwe.

⁶⁰ Gomme hlokomalang, feela bjalo ka ge Ahaba a nyetše Isebele nakong yela ya lebaka la leswiswi la Israele, o tlišitše go rapela medingwana ka Israele, sona sekai sa lehono. Feel a mo lebakeng la leswiswi; ge re etšwa ka baapostola ba pele, tikologo ya bobedi, tikologo ya boraro, godimo ka go lebaka la leswiswi, mengwaga ye makgolo a lesometlhano. Feel a bjalo ka ge Ahaba a nyetše Isebele gomme a tlišitše go rapela medingwana ka Israele, kereke ya Moya wo Mokgethwa e dirile bjalo ya nyala ka go diism, gomme e tlišitše go rapela medingwana morago, gomme lehono ke sebolepego sa Bokriste. Le a bona? Le a bona, feela leswiswi kudu. Gomme bjale e šuthetše tlase, letšatši le lengwe le le lengwe; lebaka le lengwe le le lengwe la kereke le šuthela tlase go selo sela sa go swana, go sehloa se segolo, go seemo sa bolelo se se tlago, Lebaka ka Kereke ya Laodikia ye bolelo. Oo, a iri ya go šiiša yeo re phelago ka go yona.

⁶¹ Theetšang. Ke nyaka go ipolela thwi fa, pele ke eya bokgole e ka ba bofe. Ke nna moriri wa fešene ya kgale yoo a dumago go bona matšatši a kgale gape. Ke bone bontši kudu bja kekišo ye, Hollywood e dira Ebangedi go tuma, go fihla ke lapišitšwe ke yona. Ee, mohlomphegi. Ke nyaka go bona fešene ya kgale. Ke a boifa re dira Bokriste go kganyogega go batho; ke mothalo wa kotsi.

⁶² Bjale, Josafate a theoga, o nagana, “Oo, gabotse, kgoši ye kgolo ye ya Israele, ke tla no . . . Oo, gabotse . . . Go tla loka.” Gomme thwi ka gare ga matsaka a magolo ohle a, o dirile eng? O dirile sekgotzi, go rotoga le go lwa le lenaba, mo mabaleng a go swana, ka gobane ba rile, “Bobedi re batho ba go swana.” Eupša ba be ba se. Se tee e be e le sehlopha sa go tlala ka Moya, se sengwe e be e le sehlopha se bolelo. Ga se bona batho ba go swana. Aowa, mohlomphegi. O ka se kgone go ba le . . .

⁶³ Leswiswi le ka se be le kopanelo le seetša. Bo-bo bošego bo ka se be gona ka bogoneng bja seetša sa letšatši. Gomme nako ya boradia kudu e lego gona, ke magareng ga dinako. Feel a ge letšatši le dikela goba le hlaba, ke nako ya boradia kudu e lego gona. Ga go pono go lekanelo go bona go hlaka; mabone a gago go koloi ya gago ga a bontšhe gabotse le go hlaka. Go kaone go ba leswiswi goba seetša. Jesu o rile, “Fiša goba o tonye, e sego bolelo.” Feel a, woo ke mothalo o kotsi.

⁶⁴ Gomme gona Josafate, ge a theogile, gomme sekgotsi se segolo se se dirilwe, se se sa thabišago Modimo. Gomme hlokamelang, feela mo nakong ya gagwe, go thantshela gohle bjale, “Ke hweditše kgaogelo le kgoši ye. Gomme, oo, ke—ke—ke ne kopanelo le moagišani wa ka. Ke na le . . .”

⁶⁵ Le a bona, ntšhang mahlo dinameng, seo, kereke. Le a bona? Ke seo se hlolago bothata bjhohle go dikologa tabarenekele ye fa, le go dikologa ye nngwe. Le a bona? Ntšhang mahlo dinameng se le tswakanago le sona. Le a bona? Etlang thwi ntle, gomme e ka ba bakeng sa Kriste goba go beng kgahlanong le Yena. Le a bona?

⁶⁶ Bjale, moisa yo o dirile sekgotsi, gomme o naganne o be a dirile se sengwe se segolo. Efela, ge a rile, “A ga go bjale, pele re ka rotoga, re swanetše go rerišana le Morena ka se?” Bjale, Josafate o bile le bodumedi bo lekanego bo šetše ka go yena, diphosong tša gagwe, gore o be a ile tlase fale go kgoši ye, eupša o bile le bodumedi bja go lekanelo bo šetše ka go yena go nagana, “Gabotse, re swanetše bonnyane go rerišana le Morena.”

⁶⁷ Bjale, Ahaba o be a eya thwi ntle le go bolela lentšu; feela ya gagwe mong ya kgerekgere, ya nama, tsela ya motho ya go dira dilo.

⁶⁸ Ke no makala thwi fa, kereke, ge eba seo ga se se be, makga a mmalwa, re dirile diphosong. Go e nagantšhiša, le go re, “Gabotse, e swanetše go ba ka tsela ye,” gomme re e bea ka mokgwa woo.

⁶⁹ Ke nagana ke moo boebangedi ka moka bja Amerika bo lego lehono, gore re e beile ka sebopegong sa—sa, ke tla re, boebangedi bja Hollywood, ka moka ka ga matsaka. Re lemoga moebangedi o tla sefaleng, lehono, gomme, oo, o ikgogomošitše gohle, le go bolela bontši ka moka bja metlae pele a thoma go rera, le dilo boka tše, le go ya pele le go diragatša boka rametlae, mo phuluphithing. Ge go etla nako go dira pitšo ya aletara, batho eibile ga ba bone tlhokofalo e ka ba efe go dira pitšo ya aletara ka yona. Yeo ke nnete. Ke ka lebaka leo lefase le tsenego ka seemong sa bolelo lehono, seo le lego ka go sona.

⁷⁰ Ke a makala, lehono. Go no ba, lehono, ke . . . Kereke, re lekile go romela bašemané ba rena sekolong, go ithuta saekolotši, le go ya pele ka mokgwa woo, go tseba ka fao ba beago lenaneo, go fihla phuluphithing le go beakanya wa rena . . . Molaetša o goketša kudu, gore o tla swara batho, le go swara šedi ya bona. Gomme bontši bja borasaekolotši ba bagolo ba ya ntle bjalo ka barutiši ka mokgwa woo, le go diragatša le go bea godimo bontši ka moka bja se sengwe. Gomme ke no makala, ge bona . . . gore . . . Ka mehla re bolela ka bobotse le kgogedi ya kereke. Eupša re šitwa go ba botša, “Yo a tla Ntatelago, anke a ikgane yenamong, a tšee sefapano sa gagwe, gomme a Ntatele.” Ke a makala ge eba ga se re dire bobotse bja kereke botsana kudu, go moisa yoo a tsenago.

⁷¹ Mohlala, kereke ya Baptist lehono e ne slokane, “Milione gape ka ’44,” go tseeleng maloko ka gare ka diketekete, le masomesome a diketekete, basesokologe, feela batho ba ba sepelelago ka gare le go tšoena kereke. Gomme ke morwalo go Kereke ya Jesu Kriste, go tšeela maloko a bjalo ka gare. Ba sa nwa. Ba sa kgoga. Ba sa kempola. Ba sa aketša.

⁷² Ba tla kerekeng, ba letetše go tlošwa bodutu ke sehlopha sa baebangedi ba Hollywood seo se emeelago, sa bea bontši bja matsaka, le bontši bja diletšo tše kgolo di dutše godimo le fase mo sefaleng.

⁷³ Mola, ba swanetše go ba le ya fešene ya kgale, Modimo pele, go llela ntłe, pitšo ya aletara tlase fale; moo banna le basadi ba sa tlego go dira matsaka, goba go kitima godimo le fase le go itira rametlae, eupša go tla fase aletareng le go lemoga gore lehu la Jesu Kriste fale, yoo a ba hwetšego, gore ba tla morago ba hlokofetše le Modimo gape.

⁷⁴ Ke a makala ge eba re sa phele ka nakong ya mohuta woo, ge re tsea baebangedi ba bagolo, boka ba bantši bao ba kgabaganyago dinaga lehono, ba baebangedi ba go tsebalega gagolo ba ba ithutago saekolotši gomme ba gogela batho kerekeng. Eupša morago ga ge o kile wa ba tliša ka kerekeng, gona o ya go dira eng ka bona? Ke eng—ke eng ba yago go e diragala morago ga ge ba tsene kerekeng? Go no tšoena kereke, le go ya morago ka mohuta wa go swana wa sebe le tumo ya go swana yeo ba tsenego ka kerekeng le yona. Ba ya morago ka tsela ya go swana. Gomme ke ka baka leo, lehono, lefase le a lebelele, le rile, “Gabotse, ge eba monna *yola* o ne bodumedi, ge eba motho *yo* o ne bodumedi . . .”

⁷⁵ Ke a boifa re e dirile bobele kudu. Ke, ke rata . . . Ke a nagana, thabo, ka nnete, ke dumela gore mathabo ohle a letše ka go Jesu Kriste. Yeo ke nnete. Ke a dumela go a kgahliša le go thabiša. Eupša elelwa, ngwanešu, ke tsela ya mahloko le tlaišego le sefapano. O swanetše go lemoga seo, le sona. Yeo ke nnete. Ke a makala ge eba ga se re e pente go thelela gannyane kudu—gannyane kudu.

⁷⁶ Boka, ke be ke lebeletše, gomme mosadimogatša wa ka o beile . . . Ke tšwetše ntłe, gomme o beile rosa mo paiking ya ka mosong wo. O rile, “O swanetše go e apara. Mmago o a phela.”

Gomme ke rile, “Oo, hani, ga ke tsebe.”

⁷⁷ Letšatši la Mme le a kgahliša, eupša ke go swana le lefase, ba dirile selo go ba sa kgwebo, feela go no rekiša matšoba le dilo boka tše. Gobaneng, ke kgobošo go mme. Gobaneng, mme wa ka ke mme wa ka letšatši le lengwe le le lengwe la ngwaga, ee, mohlomphegi, e sego feela letšatši le tee.

Ke tla re, “O rata mmago?”

⁷⁸ “Ke mo rometše sehlopha sa matšoba Letšatši la Mme la go feta.” Gabotse, ngwanesu, o swanetše go ba mme letšatši le lengwe le le lengwe. Eupša ke kgwebo.

⁷⁹ Letšoba lela ke le lebotse. Ke rata letšoba le lebotse. Ke nagana ka leo feela boka ke dira... Ka fao letšoba le lego botse. Le a khukhuša. Gomme le ne monko. Gomme mofeti o a o dupelela. Phoofolo e tla kgauswi, e a o dupelela. Eupša, bjale lebelela, ke le lebotse. Boka Kereke ya Morena Jesu Kriste, Ke selo sa go tagafala kudu; Phodišo Kgethwa, le maatla, le matete, le maswao, le mehlolo, le tokologo go tloga sebeng. Ke lefelo le lebotse. Eupša, lebelela, ge eba letšoba lela... Re tla swanela go tla, Kereke, go swana le tlhago yohle.

⁸⁰ Rosa yela, go beng ye botse, kgomo ye nngwe le ye nngwe ka nageng e tla e latswa ge e ka kgona. Eupša tlhago e neetše ka mebetlwa ye mennyanne, marumo a mannyane a tsupologetše ntle fale, a bitšwa mebetlwa, gomme di a a tlogela. Yeo e a le šireletša. Seo ke tlwa.

⁸¹ Gomme ke a nagana, lehono, ge eba ga re ne Lentšu la Modimo, le bogale go feta tšoša ya magalemabedi, go dikologa bobotse bja maatla a bokgethwa bja Modimo, re ya go dumelela kgomo ye nngwe le ye nngwe ka nageng go Le latswa le go Le ripa. E tla Le hlafiša. E tla ba morwalo go Kereke. Yeo ke nnete.

⁸² Ke a nagana, lehono, se re se hlokago ke bontši bja ba fešene ya kgale, badiredi babitšwa ke Modimo, ba batala, mohlomongwe ba se ne bontši bja thuto, eupša ba tla tliša batho tlase aletareng, gomme fale ba ba le mahloko. E sego ka thabo le sesego, le go budulela tšhenkamo, le go bea leina la bona lephepheng; eupša, ngwanesu, go llela ntle ga kgale le go hwela ntle, go fihlela banna le basadi ba sokologa ka go felela go tloga dibeng tša bona gomme ba tla kgauswi le Modimo. Amene.

⁸³ Ke a le botša, re ne, “Phagamiša diatla tša gago, ke mang a nyakago go amogela Kriste,” tšohle ka mokgwa woo. Go lokile, ngwanesu, eupša seo ga se—seo ga se rake sebe.

⁸⁴ O swanetše go sokologa pele, o loke, o tle fase fale gomme ka kgonthe o llele ntle. Ke kgona go elelwa dinako ge batho ba fešene ya kgale ba tla sepela tlase go kgabola mokgoba, le godimo le tlase ditseleng, ba lla, le go bolela le baagišani ba bona. Bao e be e le Bakriste ba letšatši leo; ba ba botša ka dilo tša Morena.

⁸⁵ Gomme, lehono, re bea leina la rena godimo ga puku ya kereke, le go ya ntle le go dula gae, le go se tsoge ra bolela lentšu ka Yona. Go se tshwenyege. “Feelā ge feelā re le ba kereke, go lokile.” Ke ne kgonthe re phošitše fao, batho. Senkasenkang. Gobane, seo se ka se eme dīkahlolong. Aowa, mohlomphegi. Go ka se ke.

⁸⁶ Ga go selo bonnyane, “Yo a tla Ntatelago, anke a ikgane yenamong, a tšee sefapano sa gagwe, gomme a hwe tšatši ka tšatši.” Dula o hwile, fale mo sefapanong. Yeo ke nnete. Mahloko!

“Tsela, ke tla tšeа tsela,” le a opela, “le banyatšiwa ba se bakae ba Morena.”

⁸⁷ Ke a nagana lehono, a nako yeo re phelago ka go yona! Gore, boebangedi, ba bo bea ntle ka maboneng a magologolo a go phadima, gomme ba leka... Ge o bona moebangedi a etla toropong, o a makala. Nna, dikopano tša ka di bile molato wa sa go swana. Yeo ke nnete. Ke a makala ke mang a tlago toropong, nako ye nngwe, moebangedi goba Jesu Kriste? Gobaneng, ba ne...

⁸⁸ Ke ile ka lefelong fa, e se kgale kudu, moo moebangedi tsoko a bego a swanetše go tla. Le Jesus's Name... Gobaneng, ba bile le seswantšho sa moebangedi, “monna wa iri,” monna ka *se*, le monna ka *sela*.

⁸⁹ Nna, dinako tše dingwe ke nagana ka bodiredi bja ka, le go bona batho ba etla. Gomme ke tla tsena kamoreng ya hotele, ka re, “Modimo, ke mang—ke mang batho ba tlago go mmona, nna goba Wena?” Le a bona? “Ge eba ba tlela go bona nna, ba lahlegile, golebjalo; eupša, O Modimo, mphušule, ntloše. Ke nyaka go Go emela, Yena Yo re tla emago pele ga gagwe letšatši le lengwe, ka diatla tša go roromela le go roromela, mmele wa go fokola, ke Go lebeletše. Go tsebeng gore soulo ya ka e kadietše ka sephetho sa Gago.” A re phagamišeng Kriste.

⁹⁰ Lehono, o re, “Gabotse, ke wa Baptist. Ke nna Momethodist. Ke wa tabarenekele. Ke dira *se*.” Oo, seo ga se ne selo go dira le yona; ga go selo. Ke a makala nako ye nngwe.

⁹¹ Fa e se kgale kudu, ke bone pa—pa papatšo godimo, moo lesolo tsoko le bego le e tla toropongkogo. Gomme lentšu la monna, leina la monna le kitima maletere a magologolo gohle go dikologa, ka mokgwa *woo*. Gomme mo tlase, mo khoneng ye nnyane, e rile, “Jesu Kriste wa go swana maabane, lehono, le go ya go ile,” tlasetlase khoneng. Le a bona?

⁹² Ba tlošitše bokgethwa bjohle go Kriste, gomme ba bo beile go monna tsoko, goba kereke tsoko, goba mokgatlo tsoko. Ngwanešu, ke a go botša, o ka no atlega ka matsaka, go dira metlae ga Hollywood, ka mokgwa *woo*, ka... ka kereke. Eupša, mo Bogoneng bja Jesu Kriste, Yena ke Yena go tagafatšwa. Yeo ke nnete. Bjale, yeo ke therešo, ngwanešu le kgaetšedi wa ka wa go ratega.

⁹³ Le se ikwele go mpefelela. Le no elelwа gore ke a le rerela. Ke nyaka go rera o ka re ye ke therо ya mafelelo nka tsogego ka e rera bophelong bja ka. Ke nyaka go rera, therо ye nngwe le ye nngwe ke e rerago, o ka re ke be ke le mothо yo a hwago a rerela batho ba ba hwago. Gomme, ke yena; lebone la ka le a kunyela, letšatši le lengwe le le lengwe; le la gago, le lona. Gomme re batho ba ba hwago. Gomme re swanetše go lebana le Modimo yo a phelago, a mangwe a matšatši a, gomme bokaone re be tlhokofalang ya go teba ka *se*.

⁹⁴ Feela ka go matsaka, le go ya pele, le go tšoena kereke, le go ya *fa* le *fale*, go dira ka tsela *ye* le ka tsela *yela*.

⁹⁵ Bokaone re be le dikopano tša thapelo tša fešene ya kgale ka magaeng a rena, le go llela go Modimo, mosegare le bošego. Letšatši le batametše, “nako ya tlalelo, nako ya bothata.” Beibele e rile, “letšatši la leswiswi.” Gomme re phela ka go lona.

⁹⁶ Ka fao monna yo mogolo yo a theogetšego fale ka tlase ga thanthshelo. O itšoenne yenamong le babolelo, le bamollwaneng, gomme o naganne o be a dira se sengwe se segolo, o naganne gore Modimo o be a mo šegofatša. Gomme a sa lemoge gore gona nako yela o be a tliša sehlopha sohle se le yena. Eng? “Sehlopha sa rena se sennyane, sa—sa Juda godimo fa, se tla theoga le go itšoena renabeng le dihlopha tše kgolo tša Israele. A batho ba maatla re tla bago bona.”

⁹⁷ Ke lena bao. Gomme woo ke ona mothalo wa phoro diabolo a o šomišago gonabjale, go tsenya molwalekriste; feela ka nnete boka ke eme ka go se. “Re tla kopanya matsapa a rena mmogo.” Re ka se kgone go dira seo. Babedi ba ka sepela mmogo bjang, ntle le ge ba kwane?

⁹⁸ United States ye e dira bja go swana, boitemogelo go swana mong le phošo ya go swana, ge e kopane le Russia morago kua. Nakong yeo ba be ba no ba komana go ba le ntwa, gomme ra ipofa renabeng mmogo le Russia. Gomme bjale le bona se re se hweditšego, a ga le? Ba ne difofane tša rena le diphiri tša rena tšohle, le dipomo tša athomo tša rena le se sengwe le se sengwe se letše godimo fale, go e thuthupišetša morago go rena. Selo sa go swana se ya ka tša semoya.

⁹⁹ Gona re hwetša, morago ga ge Josafate a dirile sekgotse se, gomme ba rerišane. Bjale šetšang, šetšang lefase la ka ntle, o rile, “Kgonthe, re ne boati bja baprofeta tlase fa. Re ne seminari e tletše ka bona.”

¹⁰⁰ Ba a theoga gomme ba hwetša baisa ba ba katišitšwego, ba ba tsebilego saekolotši, bao ba tsebilego tšohle ka yona. O rile, “Rotogang bjale, gomme re a botšiša le go rerišana le Morena.”

¹⁰¹ Bohle ba bona, ka nnete, ka monagano wa bona wa nama wa go ikgogomoša, ba rotogela fale gomme ba rile, “Bjale, lebelela, rena . . . Wena rotoga. Morena o ne wena, gomme Morena o ya go go fa seripa sela sa naga godimo fale. Yela, e ya go ba ya gago. O ya go kgoromeletša Basiria bohle moragorago. O ya go e dira.” Yo mongwe wa bona ebile o itiretše yenamong para ya dinaka tša tshipi, gomme a thoma go kitima tikologong ka mokgwa *wo*, a re, “Se ke sona, o ya go kgoromeletša Basiria kgole.”

¹⁰² Eupša, Josafate, feela wa semoya gannyane, go kgotlelela ditšiebadimo tšela tša go dira metlae. Yeo ke nnete,

¹⁰³ Modimo, re fe boJosafate ba bangwe gape, ba lapišitšwego ke go dira metlae fa ga Hollywood. Yeo ke nnete, ba aparago, ba

itira go ba se sengwe seo ba sego sona; ba dira ntle, ba diragatša, ba gogela ka gare. Gomme ge ba tsene, o hwetša eng ge o tsene? Boka go kgopeleleng motho, “etla o ruthe ka leganateng.” Ga se selo eupša lešikahlaba hlogong ya gago, go go hlolela manyami ka morago.

¹⁰⁴ Bjale lemogang, ke eng o ka go ba tliša ka go yona? Mohumagadi tsoko o rile go nna letšatši le lengwe, “Monna o rile, ‘Ke tla ya kerekeng, eupša ke tla hwetša eng—eng ge ke ile kerekeng?’ O rile, ‘Yohle ba e dirago ke go beakanya selalelo tsoko, gomme bona...ka ga *se*, *seo*, le se *sengwe*.’” Gomme mohumagadi o rile, “Ke eme ke hloka polelo, gobane ga se ke tsebe ke mo romele kae.” Ke lena bao. O rile, “Ke duma nka hwetša kereke ya kgale moo ka kgonthe ba opelago difela tša fešene ya kgale le go phela bomodimo.”

¹⁰⁵ Bana ba swerwe ke tlala, ba tla ja go tšwa kotikoting ya ditlakala. Go magetleng a Kereke ya Modimo yo a phelago go ba fepa ka Lentšu la therešo la go phela la...la Modimo.

¹⁰⁶ Fao, ka go matsaka ale ohle le selo, Josafate o rile, “A ga go yo mongwe gape?”

¹⁰⁷ “Yo mongwe gape?” go boletše Ahaba. “Gabotse, o hloka eng ka e ka eng ka yo mongwe gape? Re ne ba bakaonekaone ba makgolonne, ba hlaotšwego, ba rutegilego, ba fepilwego godimo, banna ba tšepilego ba lego ka nageng, ba eme fa. Yo mongwe le yo mongwe wa bona ka mmtero o tee, le pelo e tee, le segalontšu setee, ba re, ‘Eya! Modimo o nago.’”

¹⁰⁸ Ke a makala ge eba United States ga se e kopane le selo sa go swana. Ke a makala ge eba Kereke ya Modimo ga se e kopane le selo sa go swana. Ke a makala. “Gabotse,” o re, “lebelela, ba ne katlego. Ba ne ye megolo, dikopano tše kgolo. Ba swara diketekete ka nako.” Eupša ke a makala ge eba ga go ne feela yo mongwe gape. Ke a makala ge eba ga go ne se sengwe go fapano.

¹⁰⁹ Re a hwetša, re ne basokologi ba dikete tše masometharo ka beke tše tshela, gomme dibeke tše tshela moragwana ga re ne o tee. Go ne se sengwe sa phošo felotsoko. Yeo ke nnete. Gomme yohle ke matsaka, go itirišeng. Lefase, ka thelebišene, ka seyalemoya, ka dipontšho tša diswantšho, le mafelo ale fale, le tšhilafaditše setšhaba se ka ditšiebadimo tša Hollywood. Yeo ke nnete. Se sengwe le se sengwe se nyaka go ba ka go matsaka a magolo. A yeo ga se therešo? [Phuthego e re, “Amene.”—Mor.] Le a tseba yeo ke therešo. Ga re sa ne bontši bofe bja bodumedi bja fešene ya kgale bjoo re bego re na nabjo mengwaga ya go feta. Ke ka gobane e hlephisišwe. Re tla tsena go yona, feela mo nakwaneng, le tla bona.

¹¹⁰ Gobaneng, a seswantšho se sebotse, goba seswantšho sa go tsepelediša, ke swanetše go rialo. Gomme Josafate yo šo o a tla, o rile, “Ee, ke a ba bona bohle. Bona ba, yo mongwe le yo mongwe, ba ne dikrata tša bona,” le e ka ba eng e bilego. “Bona

bohole ba swanetše go ba baprofeta, goba badiredi ba bagolo. Ba tšwa dikholetšeng tše kgolo. Gomme ke bona sohle se. Ba tšwa sekolong se segolo sa moprofeta, le se sengwe le se sengwe. Bohle ba mmero o tee. Yeo ke therešo. Eupša a ga go ne feela yo mongwe gape?”¹¹¹

¹¹¹ “Gabotse, o ka hloka eng ye nngwe gape, ge ba makgolonne ba efa kwano ka nako e tee?”

¹¹² Eupša monna yola, tlasetlase ka pelong ya gagwe, o bile le Modimo. Gomme o tsebile gore go be go ne se sengwe sa phošo ka seo. Ee, mohlomphegi. O tsebile go be go le se sengwe sa go bola. Gobaneng? Anke ke le feng . . . Lengwalo ga le se tsopole, eupša sese se ke se hwetšago. Ke a tseba gore—gore Josafate o tsebile gore moikaketši yola tlase fale, Ahaba, gore o be a gabotse le Modimo. Gomme Eliya o be a profetile Lentšu la Modimo go yena. Gomme Modimo o be a ka šegofatša bjang se A bego a se rogakile? Amene.

¹¹³ Ke bolela selo sa go swana lehono, mogwera. Gomme Kereke ya Modimo yo a phelago, ye e emego therešo go Modimo, e tla bolela selo sa go swana. O ka se tswake oli le meetse mmogo gomme wa e bitša phološo. O ka se kgone. O swanetše go ikaroganya wenamong, ngwanešu. Se sengwe se swanetše go direga. Ge eba go sa le kholofelo e šetšego, re swanetše go dira se sengwe, gomme re se dire ka pela; gobane, iri ya tlthatlogo e batametše.

¹¹⁴ Dilo di a pakelana, se sengwe le se sengwe, gomme kerek e kgolekgole kudu. Ba bala mehuta yohle ya dikgatišobaka, dipuku, dikanegelo, le se sengwe le se sengwe. Nka kgona go ya lehono go . . . Nka kgona go ya kerekeng, gomme ka kgona go re, “Oo, ke ba bakae ba tsebago . . .” Ba tseba sefela se sengwe le se sengwe, morago ga ye nngwe ya ditsošeletšo tše kgolo tše. “Bjale, sefela se se rilego-rilego se letlakaleng lefe—lefe?” Ba a e tseba. Ba tseba ke mang. Ba tseba ke mang a phenkgešetšanelago bakeng sa Presidente, le ke mang a phenkgešetšanelago *se*, le ka dinaletšana tše kae tša mobi di nyetšego, *se* le *seo*, *se* *sengwe*. Eupša, Lentšu la Modimo, ga ba tsebe selo ka lona. Ke lena bao. Ka fao re fa a bona mats- . . . Gomme, golebjalo, ba ipolela go ba Bakriste.

¹¹⁵ Gomme batho ga ba molato. Ke go tšwa ka morago ga sefala, moo e tšwago gona. Tlwa. Ke go tšwa ka morago ga sefala. Ba ba ruta mehuta yohle ya merethetho, le mehuta yohle ya *se* *le* *seo*, le mekgatlo, le ka fao ba ka dirago dihlapha tša bafsa, le se sengwe le se sengwe boka seo. Ke a makala ge eba e lefeletšwe. Ga go selo kgahlanong le yona, eupša ke a makala ge eba seo ke senyakwa sa Modimo.

¹¹⁶ Mola, Jesu o rile, “Ntle le ge motho a tswetšwe ka meetse le Moya, ga go ka mo a ka tsenago Mmušong. Yo a ka go le- . . . a ka Ntatelago, anke a ikgane yenamong, le maipshino

a gagwe mong a lefase, a tšeefapano sa gagwe, gomme a Ntatele.” *Sefapano* ke sekä sa “lehu, mahloko.” “Yo a tla bago Mokriste, anke a itlhohlore yenamong go dikgopolo tša gagwe mong. Anke a itlhohlore yenamong go mediro ya gagwe mong. Anke a itlhohlore yenamong go se sengwe le se sengwe, a ikgane yenamong, gomme a tšeefapano sela sa kgafelo, gomme a Ntatele tšatši ka tšatši. Yo a tla go Ntšhalamorago, anke a dire seo.” Ke seo Jesu a se boletšego.

¹¹⁷ Eupša, lehono, re re, “Yo mongwe le yo mongwe a iketle. Yo mongwe le yo mongwe a phaphathe diatla tša bona. Yo mongwe le yo mongwe a goeletše, ‘Haleluya!’ Yo mongwe le yo mongwe a dire se.” Oo, ka fao re hwetšago sehlopha sa bonganga! Amene. Modimo . . . Re hwetša dipina tše mpsha tše ntle le go di opela ka lebelo kudu, moo go bogegago o ka re re ya go phuleletša leboto ka tšona, goba se sengwe boka seo.

¹¹⁸ Mola, ke a nagana, ge nkabe re opela *Kgauswi, Modimo Wa Ka, Go Wena*, go tla ba bontši ka moka bokaone bakeng sa Kereke; difela tša fešene ya kgale.

¹¹⁹ Ba hwetša batho ba bantsi ba tansi ya okhestra, mošemane tsoko ka go tansi ya okhestra godimo fa a raloka, bošegong bja go feta, gomme bošegong bjo godimo fa a raloka ka kerekeng ya Modimo yo a phelago? Ke makgapha pele ga Modimo. Anke motho yoo a lekwa, pele, gomme anke a tšweletše kenywa, e swanetshego tshokologo, go bontšha gore o lokile le Modimo.

¹²⁰ Ba tliša lefase la jazz thwi ka sefaleng. Ba tliša Hollywood, go rera ga matsaka, thwi ka sefaleng.

¹²¹ Gobaneng, a ga se ke dula ka toropongkgolo ye botse ya lena, dibeke di se kae tša go feta, ka Louisville, Kentucky? Pelo ya ka e robegile, ge bohole ba be ba dutše fale, ba rata go bona mehlolo ya Modimo; gomme ka pela ge o rera Ebangedi, ba tla phuthaphutha, ka motsotsvana, gomme ba retolla mekokotlo ya bona gomme ba sepela go tšwa moagong. Ka nnete. Ga ba E nyake. Dipelo tša bona di thatafaditšwe. Tepogela ntle; gomme bontši bja bona, Maprotestant, le bona, ba ba yago dikerekeng tša Protestant. Eupša ba be ba bile metlatšo . . . tladitšwe go tlala kudu ka matsaka le se sengwe le se sengwe boka seo, sa ditšiebadimo le bokereki, go fihlela ba sa tsebe selo ka ga Moya wa Modimo yo a phelago. “Ba na le sebopego sa bomodimo, gomme ba gana Maatla a bjona.”

A letšatši le re phelago. Šetšang moo e pakelanago.

¹²² Josafate o rile, “Ke a tseba, Ahaba. Bareri ba gago ba makgolonne šebao. Bohle ke baisa ba go bogega gabotse, yo mongwe le yo mongwe wa bona o apere gomme moriri wa bona o kamilwe ka bothakga, le se sengwe le se sengwe, e ka ba eng gape ba ka bago. Ba ka no ba le diD.D. tša bona. Ba ka no ba le mehuta yohle ya dignata. Ba ka no tseba Mangwalo, go tloga go

A go ya go Z. Eupša a ga o ne yo mongwe gape, felotsoko? Go no se be le yo mongwe gape, felotsoko?”

¹²³ O rile, “Ee, o gona yo mongwe gape, eupša ke mo hloile.” Ke lena bao. Ke lena bao. “Ke mo hloile.” Elelwang, Ahaba o be a le monna wa bodumedi, gomme ba ba be ba le barutiši ba bodumedi, eupša ba hloile monna yo yo a bilego le Therešo. O rile, “Ke mo hloile.” O rile, “Ka mehla o bolela se sengwe kgahlanong le nna.” A ka kgona bjang go lesa go e dira, mola Lentšu la Modimo le mo sotše?

¹²⁴ O ka homola bjang ge o le monna wa Modimo, goba mosadi wa Modimo, gomme o tseba le go bona sebe le dilo, di pakelana le go kalwa, le se sengwe le se sengwe boka seo; le go bona disoulo tša batho di eya heleng; dimilione ka letšatši; gomme wa homola? O ka se kgone go e dira.

Yo mongwe o rile go nna letšatši le lengwe, o rile, “O nagana o ka e thibela?”

¹²⁵ Ke rile, “Aowa. Nkase kgone go e thibela, gobane Modimo o boletše. Eupša letšatši le lengwe, mo Lefelong la Kahlolo, ba ya go gogela sekrini se segolo ntle, ba gotetša setšeadiswantšho mošola, gomme segatišmantšu seo se ya go ralokwa. Gomme ke ya go ema le go se theeletša; ke nyaka go kwa segalonču sa ka se sebotša kgahlanong le yona. Modimo o tla nkahlola ge segalonču sa ka se etla kgahlanong le yona.” Ee, mohlomphegi. Ge re bona bophelo bjo, moloko wo, o tsošološitšwe gape mošola ka kahlolong. Ka nnene. Re phela nakong ye šoro. Gomme šeo yona.

Gomme re mmona a dira...o rile, “A ga go ne yo mongwe gape?”

¹²⁶ O rile, “Ee, eupša ke mo hloile, gobane ka mehla o profeta bobe kgahlanong le nna.”

¹²⁷ A ka kgona bjang go tlogela go rera dilo tšela tše boima, mola a e bona e kgatlampana? A bona Ahaba a phela bjalo ka ge a be a le gomme a dira bjalo ka ge a be a le, gomme a tliša batho bjalo ka ge ba le.

¹²⁸ Monna wa Modimo a ka kgona bjang, goba mosadi wa Modimo, a tlogele go goeletša ntle le go kgala sebe go tloga lehlakoreng le lengwe le le lengwe? Ge, ba bona bareri ba bolelo ba, le ba matsaka, le barutiši, le go ya pele ka mokgwa woo, ntle go dumelela batho go ya heleng, ka dimilione, ka tlase ga phoro; bontši bja...ebile le ka go batho ba bokgethwa. Ga ke bolele kudu ka Mamethodist le Mabaptist, le dilo boka tše; ba ne yona, le bona. Eupša e thwi tlase ka go direnke tša gago mong.

¹²⁹ Nna, go tleng sefaleng, boka se sengwe le se sengwe gape eupša Bakriste, ba phela boka se sengwe le se sengwe gape, go kgabaganya dinaga le dilo, ka gona ba e bitša “bodumedi.” Ke bodumedi, eupša bo kgolekgole go tloga go phološo ya Morena. Yeo ke nnene. Ba nno dira batho go feelsa sehlopha se segolo sa go

itiriša. Ka gona ka pela ge modirelo wo monnyane o eya godimo, ka gona, selo sa pele le a tseba, o ka se kgone go hwetša yo motee wa bona; kereke e dutše e se ne selo. Ngwanešu, ge motho a rata Modimo, o tla tlatša setulo sa gagwe ka kerekeng, nako le nako. A ka se dule kgole le yona. Yeo ke nnete.

¹³⁰ Bjale hlokamelang, feela metsotso e se mekae. Ke tla leka go hlaganelo, go ya thwi go ntlha bjale, gobane nako ya ka e a tšhaba.

Elang hloko, ka gona o rile, “A fao ga go eupša yo motee gape?”

¹³¹ O rile, “Ee, eupša ke mo hloile. Ka mehla o profeta kgahlanong le nna. O bolela dilo tše mpe kgahlanong le nna.”

“Go lokile,” o rile, “eya o mo tšee.”

O rile, “Leina la gagwe ke Mika.”

¹³² Eupša monna yo o bile le bodumedi bja go lekanelo go tseba gore baisa ba ba be ba se ba loka.

¹³³ Gomme monna mang kapa mang yo a kilego a kgwathwa, nthatana ye nnyane, ke Moya wa Modimo, o tseba gore dilo tše, tše di bitšwago Bokriste lehono, ga se tša loka. “O ka se kgone go rata lefase, goba dilo tša lefase. Ge o dira, lerato la Modimo ga le ka go wena.” Beibebe e boletše bjalo.

Bjale lebelelang. O rile, “Eyang le mo tšee.” Gomme ba ile godimo.

¹³⁴ Gomme morago o rometše motseta yo monnyane wa kgale mmogo, motikone wa kereke, mohlomongwe, goba yo mongwe, o ile godimo kua gomme a re, “Bjale lebelela, Mika, re ya go go tliša godimo mo pele ga Ahaba le Josafate. Bjale, bobedi ba dutše ntle kua, gomme ke banna ba bagolo bjale. Ke barutiši gomme ke dirutegi. Gomme ba ne grata ya bona, le go ya pele. Gomme ye nngwe le ye nngwe ya seminari ya rena, ye nngwe le ye nngwe ya dikereke tša rena mo, ke ba go phethagala ka kwano gore ye ke thato ya Morena. Bjale, o bolela selo sa go swana ba se bolelago, gomme, ke tla go botša, o tla apara bokaone le go namela ka go koloi ya Cadillac. Ke a go botša, o tla no ba moisa yo mogolo ge o ka dira seo. Ee, mohlomphegi. O tla atlega.”

¹³⁵ Mika o rile, “Bjalo ka ge Morena Modimo a phela, ke tla bolela feela se Modimo a se bolelago.” Amene. Ya. Oo, go na le monna ka morago ga pelo ya ka. “Nka no swanelwa ke go ja borotho le meetse,” ao a a dirilego, “go e direng.” A ka no be a iteilwe godimo ga thama ye tee le ye nngwe, e ka ba eng gape, eupša o boletše Therešo gomme a ema le yona. Modimo o e tiišeditše go ba Therešo. O be a sa tsebalege kudu, eupša o tsebile Modimo.

¹³⁶ O tlišitše Mika yo monnyane wa kgale godimo kua. O rile, “Go lokile, Mika, o reng ka yona?”

¹³⁷ O rile, “Eya godimo. Eya pele godimo.” O rile, “Eya godimo, ka khutšo. Eya pele, o atlege, seo ke se ke nyakago o se dira. Eupša ke bone Israele boka dinku, ntle le modiši, godimo ga thaba, e šwalalantšwe. Yeo ke yona,” o boletše.

¹³⁸ Gomme ge a dirile ka mokgwa woo; gomme Ahaba a retologa go dikologa go ya go Josaſate, a re, “Ke go boditše eng? Mopshikologimokgethwa yola . . .” goba, eng, ntshwareleng, goba, e ka ba eng e bilego; mothaka yola o rile, “Yola . . . Ke go boditše eng? Moisa yola o tla profeta feela bobe—bobe kgahlanong le nna. Ke boletše eng? ‘O tla ahlola feela kereke ya rena, le go ahlola badiredi ba rena, le go ahlola tsela ya rena ya bodumedi.’ Ke go boditše eng? O tla e bolela. Ke a mo tseba. Ke tsebile papagwe pele ga gagwe.” Amene. [Ngwaněšu Branham o phapha diatla tša gagwe mmogo—Mor.] “Ke tsebile papagwe pele ga gagwe.” Uh-huh, ee, mohlomphegi, monna wa kgonthe wa Modimo. O rile, “Ke tsebile o tla bolela seo.”

¹³⁹ Gomme kafao nako yeo o rile, “Ee,” o rile, “ke bone Israele boka dinku, di šwalalane, ntle le modiši, mo thabeng.” Gomme kafao gona o rile, “Ke . . .”

¹⁴⁰ Gomme nako yeo yo mongwe wa baisa bale yoo a bilego le dinaka tše kgolo, o be a eya go kgorometša go tloša. Moreri o sepeletše godimo gomme a goga Mika yo monnyane go dikologa, gomme a mo phasola molomo ka maatla ka fao a bego a kgona, o rile, “Ke tsela efe Moya wa Modimo o ilego ge O tšwile go nna? Ge o tseba.”

¹⁴¹ O rile, o rile, “Leta go fihla o dutše ka kgolegong godimo fa, gomme o tla tseba ke tsela efe O ilego.” Yeo ke nnete.

¹⁴² Letang go fihla Russia e dutše ntle mo, e tsea ditšhaba le dilo boka tseo, le naga ye, ka baka la go kgeloga ga yona, gomme le tla bona se se bego se nepagetše le sa phošo. Yeo ke nnete. Le tla bona ge eba bodumedi bja lena bjo bolelo bo tla lefa, goba aowa.

¹⁴³ Anke setšhaba se se tle go megokgo, e sego go tla go sesego le terama. Anke setšhaba se se tle matolong a sona, ka tshokologo. Seo ke se re se hlokago. E sego tsoséletšo go hwetša bontši ka moka bja batho ka kerekeng. Re hloka go tswalela sekoti se sengwe le se sengwe sa botagwa, go emiša go kgoga sekerete gohle, go phušola difeme. Go thomiša la kgonthe, la fešene ya kgale, lesolo la Moya wo Mokgethwa; moo banne le basadi, mosegare le bošego, ba robetše sefahlegong sa bona, ba lla. Ke tla le botša, e tla ba seširelo se segologolo kudu seo setšhaba se kilego sa ba le sona. Yeo ke therešo.

¹⁴⁴ Anke Tabarenikele ya Branham e tlogele bošilo bja yona. Anke e boele morago mo aletareng gomme e lokiše le Modimo. Lokišang le baagišani, le go ya pele ka mokgwa woo, gomme le loke le Modimo. Le ka se be le dikgogakgogano tše itšego le go ya pele; e tla ba lefelo le gogago la lefase. Yeo ke nnete. Bjale, yeo ke therešo.

¹⁴⁵ Gona o rile, “Ke tsela efe Moya wa Modimo o tšwilego go nna?”

¹⁴⁶ Gomme Mika a re, “Ke bone Modimo, le lešaba la Gagwe, khansele ya Gagwe, a dutše Letagong.”

¹⁴⁷ Le a tseba, Modimo o na le khansele godimo Kua, gatee ka lebakana. Yena, O tliša godimo Diphedi tša Gagwe—tša Gagwe tša Barongwa gomme o swere kha—kha khansele, gatee mo lebakaneng, godimo ka Legodimong.

¹⁴⁸ Gomme o rile, “Ke Mmone a dutše godimo ga Terone, gomme batho bohole ba be ba eme ka go seatla se setona le se setshadi sa Gagwe.” Gomme o rile, “Ba be ba ahlalaahla, ‘Ke mang re ka mo hwetšago go ya tlase le go fora Ahaba, go mo ntšhetša ntle mo le go phethagatša seprofeto sa Eliya? Modimo o boletše bjalo, se se bego se eya go direga, kafao re tla no bona ke mang a ka yago tlase.’”

¹⁴⁹ “Gomme moya wa maaka o tla godimo go tšwa ka tlase,” ka nnete, go tšwa heleng, “o tla godimo pele ga Modimo gomme o rile, ‘Ke tla ya tlase, gomme ke tla tsena ka go bareri bale le go ba dira bohole go profeta maaka.’” Oo, a seo se ba rathagantše. A seo se ba dirile ba ikwele gampe, ge, “Ba rile, ‘Ke tla ya tlase le go hlola bareri bale, yo mongwe le yo mongwe wa bona, go profeta maaka.’” Gomme o ile tlase le go tsena ka go bareri bale, gomme ba thoma go profeta maaka.

¹⁵⁰ Gomme, ngwanešu, Modimo wa go swana o buša godimo ga Terone ya go swana lehono. Gomme moya wola wa go swana wa maaka o dirile selo sa go swana lehono, go profeta maaka.

¹⁵¹ Ba tšwetšepele ba re, “Khutšo, khutšo, khutšo,” ka morago ga Ntwa ya Pele ya Lefase.

¹⁵² A ke le laetšeng moo e tšwago. Ka go Ntwa ya Pele ya Lefase, ge Fora, godimo kua, e retologile go tloga go Modimo, ka go Masomesenyane a bona, gomme e thoma . . .

¹⁵³ Bjale ke ya go hwetša maitshwaro a mannyane, kafao lena bohole le no dula go iketla ka kgontha lebaka la metsotso e se mekae.

¹⁵⁴ Lebelelang, go morago kua, ka mathomong, godimo ka Fora, fao ke mo go lego togotogo le tšhila la mathomo e thomilego. Ge eba go kile gwa ba le kolopisane ka lefaseeng, ke Paris, Fora. Gomme gabotse ke nyakile go sepela bontši bja yona, gomme leo ke lefelo le lebelebe nkilego ka le bona. Gomme London, Engelane ga se bontši bja kgaolo. Gomme United States e tla thwi ka mothalong le yona. Yeo ke nnete. Bona šebale.

¹⁵⁵ Nako le nako ge o roba maitshwaro a bosadi, o roba lerapo la mokokotlo la setšhaba.

¹⁵⁶ Mo le ya godimo, ka dinageng tša bona beng, gomme la re le moromiwa, ga ba rate . . . O re, “O ya go re botša go dira eng, go opela dipina tša ditšhila ka basadibagatša ba ren, goba

ka basetsana ba rena? O ya go re botša ka fao re ka hlalago basadibagatša ba rena? Re rute ka fao re ka nwago wisiki le go ya ka tsela ye re dirago?" Seo ke se re lego.

¹⁵⁷ Re ipitša renabeng setšhaba sa bodumedi, setšhaba sa Bokriste. Gabotse, bona "bahetene" ka Afrika ba ka kgona go re ruta maitshwaro, mokgwa wa go phela. Lefelo la go bola, ka United States, goba, lefase, go nyakile, ke setšhaba se, ka fao se nago. Ke nna Moamerika, nnete. Eupša, ngwanešu, nka se kgone go thuša, ge go tloga pele ga Ahaba goba Josafate... Gomme ke swanetše go bolela se Modimo a rego ke Therešo. Seo ke se kereke e hlokago go se emela, lehono. Ge e etla gare ga setšhaba le Modimo, ke Modimo, ka mehla. Ee, mohlomphegi.

¹⁵⁸ Elang hloko, ka Fora, ba thomile ka moka go bola gohle ga bona, le go ya ka tsela ye ba bego ba phela godimo kua. Gomme ka gona Modimo o rometše Jeremane ka go bona, go ba itia godimo gannyane nthatana. Ka gona re ile godimo kua go phološa letlalo la bona. Gomme ka pela ge re dirile seo, le go thopa ntwa, go romela Majoremane morago, ba bile le khutšo le Fora, a ba retologetše go Modimo? Aowa, mohlomphegi. Basadi, beine, bohlola, sebe le tšhila go ya methopong.

¹⁵⁹ Ka gona ba dirile eng? Go diregile eng? Mo ke mo a thomilego. Diabolo o beile motsemošate wa gagwe godimo kua. Fao ke mo a thomilego, thwi fao, go tšhilafatša lefase, go tšwa Paris, Fora.

¹⁶⁰ Gona, ge le ka hlokomela, ga se a kgone go tsena ka fa ka bodiredi, kafao selo se a se dirilego e bile go tla ka Hollywood ntle mo. O beile godimo wa gagwe Ho... O beile godimo motsemošate wa gagwe godimo fa ka Hollywood. Diabolo o kotamile morago fa, mengwaga e se mekae ya go feta, mengwaga ye lesometlhano goba masomepedi ya go feta, le madira a gagwe a magolo, gomme a ya, a itia ka Hollywood, California. Gomme o šwahletše United States ka maatla a gagwe a letimone. Thwi. Difešene tšohle tša rena di tšwa Paris. Ba e hwetsa ka Hollywood, godimo ga disekrini. Basetsana ba bannyane ba le bašemane ba bannyane, le dilo, ba tšwela ntle mo, ba bogela tšona dipapadi tša sekrini.

¹⁶¹ Digotlane tše nnyane tše kaone, baisa ba bannyane ba bakaone, ga go selo kgahlanong le bona. Modimo a šegofatše dipelo tša bona tše nnyane. Pelo ya ka e dutla madi bakeng sa bona.

¹⁶² Gomme thwi mo ka toropongkgolo, ke be ke bolela le wa ka...yo motee wa...mošemane wa ka, letšatši le lengwe. O rile, "Papa, ge go be go no ba bašemane tsoko tikologong kua, ka toropong, ba ba bego ba ne Moya wo Mokgethwa," le go ya pele. Le makala gobaneng ke be ke eya Denver, Colorado, goba felotsoko ka mokgwa wola? Hweletša bana ba ka felotsoko moo go lego sehlopha sa batho ba ba goeletšago go Modimo; se re se hlokago, ngwanešu.

¹⁶³ Naga ye, setšhaba se, toropokgolo ye, lefelo le, le fetogile go ngenega go fihla le šokiša. Ge nka kgona feela go hlagiša thwi bjale se ka go felela ke se tsebago go ba therešo thwi mo, ebile go ka se be go neelega pele ga batheeletši ba go tswakana. Goba, thwi fa ka go toropokgolo ye mong thwi fa; e sego feela fa, eupša mafelo a mangwe, mogohle, go thomile go tla ga bonolo . . .

¹⁶⁴ Ka gobane gobaneng? Batho . . . Lebelelang, bagwera, e na le mahlajana kudu. E tlie ka gare ga bonolo, go fihla e no go šušulela fase. Diabolo o be a fela a eba ka difešene. A ka no be a se a tšwe difešeneng, eupša ga se a tšwe kgwebong, ke tla le botša seo. O sa le ka kgwebong.

¹⁶⁵ Lebelelang, lehono. Re tšea, boka ke boletše nakwana ya go feta, ka ga mohumagadi yo monnyane, mosetsana yo monnyane wa kgale ka rosa. Mohlala, rosa, ke ye botse, e fao go lebelelwā, yeo ke therešo. Gomme seo se no swana le kereke, e fao go lebelelwā. Go swana le mosadi yo monnyane yo mobotse, o fao go lebelelwā. Yeo ke nnete. Eupša ge a . . . O lokile, ke gore, o go monnamogatša wa gagwe, o—o lokile. Eupša ge a se na le tšoša ya maitshwaro e tšwele ntle kua go mo šireletša, o ba morwalo go disosaele batho; o ba fase kudu le go goboša le go bola go fihla dimpša di sa mo lebelele. Yeo ke nnete.

¹⁶⁶ Gomme selo sa go swana go Kereke ya Modimo wa go phela. Ba tšwela ntle fa le go leka go kgahliša le go itokiša bonabeng, le go itshwara boka . . . Ba hlobola basadi ba bona thososo fa, thwi . . . gomme batho ga ba lemoge gore bodiabolo ba ba šwahlela magae a lena.

¹⁶⁷ Thwi ka boagišaneng bja ka letšatši le lengwe, mohumagadi yo moswa yo ke naganago ke mosadi yo mokaone . . . Gomme ke mosadi yo a nyetšwego, o na le ngwana. Gomme mosadi yo monnyane o tlie ntle kua. Mo- . . . monna o tlie go theoga tsela go dira mošomo wo mongwe, gomme mohumagadi yo monnyane yo o ile ntle fale a apere tšona diaparo tše dinnyane nthatana tša kgale, o be a šišimiša.

¹⁶⁸ Ye ke polelo ya go befa ya Letšatši la Mme. Eupša, ngwanešu wa ka, a ke go botše se sengwe. Mme, boela morago go ba mme gape!

¹⁶⁹ Ebile le go mošemane yo monnyane wa nthatana o be a etela boagišani bja rena, a tla ka gare le go re botša ka yona, “Lebelelang ntle kua.”

Ke rile, “Gabotse, seo ga se selo.”

¹⁷⁰ Mosadi ke mosadi yo mokaone. Ga ke re o hloka maitshwaro. Eupša, selo sa ntshe ke, go ne tšhila, go na le moyo wa tšhila godimo ga gagwe, o mo dira gore a dire seo, gomme ga a tsebe.

¹⁷¹ Ke eng ka lefaseng se mme a ka se nyakago, goba e ka ba mang, a apara diaparo tše nnyane tše o tša kgale tša ditšhila, le go itširimolla ntle pele ga monna? Ke wena yo mobotse, kgaetšedi.

Ke wena yo mobotse, mme. Ke leboga Modimo ka wena. Eupša, o yo mobotse, eupša ge o se na le Moya wo Mokgethwa fao go šireletša maitshwaro ao, o ka be o bile bokaone go ba sekobo kudu ga go yo a ka bego a go lebeletše, gomme o ile Legodimong. Seo ke therešo. Seo ke therešo. Hlokombela se o se dirago; maitshwaro ao.

¹⁷² Bjale, se e lego, diabolo o tlide ka gare gomme o boditše batho dilo tše. O tsene ka barering; o ekiša Hollywood. Basetsana le bona bahumagadi ba baswa, ba ekiša Hollywood. Dilo tše kaonekaone tše ba nago natšo ka nageng lehono, go hloka maitshwaro kudu o ka kgonago go go kwa, ke go bolela ka wona; polelo yohle ya seyalemoya.

¹⁷³ Mosadi tsoko wa kgale boka Mohumagatšana Kay Starr, ga go selo kgahlanong le yena; eupša go bona mokgekolo, masometlhano a mengwaga bogolo, le bohole, ka diaparo tše gagwe tšohle di mo kgoromeleditše ntle, bjalo ka ge o ka re o tšholletše ka go mokotla wa bupi. Ga ke bolele seo bakeng sa motlae, gobane ke bolela kgahlanong le dilo tšela. Eupša mosadi a dira ka mokgwa woo, gomme a ema a ba mohlala go basadi ba baswa ba Amerika, ke morwalo go setšhaba sa ren. [Ngwanešu Branham o kokota godimo ga phuluphithi makga a mahlano—Mor.] Ke diabolo.

¹⁷⁴ Mathaka boka Arthur Godfrey le bona ba kitima go dikologa fa, ba dira dilo tše ba di dirago, gomme banna ba go tsebega kudu ka nageng ka mokgwa woo, gomme, ka baka la eng, ke kgobogo.

¹⁷⁵ Haleluya! Bolela seo gobane ke ikwela Moya wo Mokgethwa o fa. Tšhwahlelo e a kgatlampana, go no swiela go tloga ntlong go ya ntlong, go tloga lefelong go ya lefelong, go tloga kerekeng go ya kerekeng, go tloga go monna go ya go monna.

¹⁷⁶ Bana, Leineng la Jesu Kriste, tsogang ka maemo a maitshwaro a tsošeletšo le Morena Jesu Kriste, gomme le re, “Ke tla tše tsela le banyatšiwa ba se bakae ba Morena.” Ee, mohlomphegi. “Ke tla ba mme wa kgonthe.” “Ke tla ba papa wa kgonthe.”

Ge lefase ka moka, le gohle go dikologa, gohle
go dikologa soulo ya ka e efa tsela,
Gona Yena ke kholofelo ya ka go dula.

Gobane go Kriste, Leswika le le tiilego, ke a
ema;
Mafelo ohle a mangwe ke kwenamohlabo,
Mafelo a mangwe ohle . . .

¹⁷⁷ Ke eng e hlotšego dilo tše tšohle? Ke eng e hlotšego badiredi go dira ka mokgwa wo? Ke eng e dirilego bareri go profeta maaka a go batho?

¹⁷⁸ Gobaneng e dirile, mengwaga ya go feta, gore lena batho ba Methodist... Ge John Smith wa kgale a be a rwaletšwe phuluphithing ya gagwe, go rera Ebangedi, gomme o rerile theroye kopana ya diiri tše nne. Gomme o rile, "Bothata bja yona ke, gore pelo ya ka e a robega." O rile, "Barwedi ba Methodist ebile ba apara dipalamonwana go menwana ya bona."

¹⁷⁹ Gomme, lehono, ba apere dišothi le diaparo tše nnyane tša kgale tša ditšhila. Gomme ba tla be ba ponoka ka go phethagala, ka go mengwaga ye mengwe ye mehlano, ge se sengwe se sa dirwe. [Ngwanešu Branham o kokota phuluphithing makga a mararo—Mor.] Go diregile eng go lena bareri ba Methodist, lena Macampbellite, lena Mabaptist? Ee, mohlomphegi. Ke diabolo, o lahletše maatla a gagwe fase, gomme o na le ditatšane tša gagwe ntle mo.

¹⁸⁰ Gomme ga le e lemoge, lena le kgoga sekerete, lena basadi, le go dira ka tsela ye le dirago ntles kua, le go nwa le go ya pele ka tsela ye le dirago. Ga le lemoge gore le tšhela mpholo tshepedišo ya lena, le go senya meloko ka moka ye e tla le latelago, ge eba go le selo se sebjalo. Diphesente tše masomeseswai tlhano go feta go leka go tšeа kankere, ka go kgoga disekerete, gomme ka boomo le sepelela thwi ka go ona. Gomme dikereke di a e dumelela.

¹⁸¹ Ka kerekeng ye kgolo ya Baptist, feela mo, kgauswana... Ke itia Baptist. Ke na le tokelo go seo; ba mokgwa wa go ithekga ka lehlakoreng le ke tšwago go lona. Eupša ge ba ile ba swanela go neelana gare ga tirelo ya sekolo sa Lamorena le tirelo ya go rera, gore modiša le bohole ba kgone go ya ntles le go ba le go kgoga, gomme mokgotha o be o eme mothalong ka banna le basadi ba kgoga disekerete. Diabolo o dirile seo. Yeo ke nnete.

¹⁸² Gona, fa ka go toropokgolo ya rena beng, yo mongwe wa badiredi ba rena ba go itlhaola kudukudu, thwi tlase fa ka New Albany, ka go lepatlelo le la papadi, gore yo mongwe wa badiredi ba rena ba go itlhaola ba toropokgolo o šupetša lenaneo la go bina wa sekwere, go tliša banna le basadi mo difaleng.

¹⁸³ Ga ke tshwenyege gore lefase le reng, ga ke tshwenyege gore o leka bjang go gola go le dikologa; ngwanešu, ga go na monna wa madi a mahubedu a gogela godimo go mosadi wa monna yo mongwe, gomme a ikwela go swana. O a tseba yeo ke therešo.

¹⁸⁴ Ba tšere basadi ba rena, le go ba hlobola thososo; ntles mošola ka diofising, le go otlela dikolointefe, le godimo le tlase mokgotheng. Moo, ba swanetše go ba gae, ka morago ga setofo, ba apea, le go lokiša dijo.

¹⁸⁵ Ke eng? Ke diabolo. Tšhwahlelo e a kgatlampana. Ga ke bolele selo ka motho *yo* goba motho *yoo*. Ke re ke meoya ya ditšhila ye e hulago batho, go ba gapela thwi ka go yona. Tšhwahlelo ya United States.

¹⁸⁶ Phuhlamišo ya kereke. Kereke e phuhlamišitšwe ke diabolo. Morago mošola...

¹⁸⁷ Ba tšeela mošemane godimo bjale, ge a etla seminaring, selo sa pele a swanetšego go ithuta ke go hwetša dignata tša gagwe. O swanetše go tsea saekolotši. O swanetše go tsea thutabomodimo. O swanetše go ruta, go hwetša mehuta ka moka ya dilo tše di ikemego ka go yena. Ge a se ne thuto ye kaone ka kgonthe, ge a se setswerere le go phadima ka mo a kgonago go ba, gona ba tla mo raka; a ka se be le maswanedi. O swanetše go dira eng? Go ya ntle mo le go neela polelo ye nnyane ya dipolitiki, bjalo ka ge go bile, polelo ya sepolitiki ya kereke, go sehlopha sa batho, sehlopha sa banna le basadi ba ba hwago.

¹⁸⁸ O Modimo, re romele ba bangwe ba fešene ya kgale, banna ba batala ba ba sa tsebego A go tšwa go B, bao ba tsebago maatla a tsogo ya Morena Jesu Kriste, ba ba tla rerago tshokologo, le go romela banna le basadi aletareng, go rata Morena Jesu. [Lefelo la go se be le selo godimo ga theipi—Mor.]

¹⁸⁹ Ke morwalo. O šwahletše diseminare. O šwahletše dikereke. O hlobotše basadi ba rena. O fihlištše banna ba rena lefelong moo o ka se ba botšego selo. Gomme banna le basadi, ke a nagana...

¹⁹⁰ O re, “Gabotse, basadi.” Ee, gomme lena banna le tla dumelalago basadibagatša ba lena go dira seo, seo se laetša se le dirilwego go tšwa go sona. Seo e no ba tlwa. Nnete. Ke kgobogo. Ke tšokio.

¹⁹¹ Gomme ka gona tlase go moreri. Moreri o eme sefaleng, lehono, sa phuluphithi ya sebjalebjale. O ema ka kua, le batho ba gagwe pele ga gagwe, gomme o rera ka selo se sengwe le se sengwe se sennyane sa kgale ka lefaseng ntle le tshokologo le sebe, le sefapano sa makgwakgwa sa Kriste. Ee.

¹⁹² Ge o bea dintlha fase; batho ba tla tla go go kwa, ka go tirelo ya boebangedi. O leka go fihla go selo le go rera Ebangedi, le go dira batho go sokologa le go ba lokiša. Ba tla ya godimo le go sepelela ntle, ba, “Ga ba swanelo go O kwa.” Aowa, ga ba dire. Eupša, baena, ba ya go swanelwa ke go sokologa goba go senyega.

¹⁹³ Matimone! Le ya sekolong; a šwahletšd dikolo. Lebelelang go dikologa, godimo ga naga lehono. Lebelelang fa, lena batho, lena Maprotestant. Lebelelang, go ne dikolo tše nne tše kgolo tša Katoliki le dilo, di agilwego godimo lehono. Gobaneng go le? Le hlephiša mapheko.

¹⁹⁴ Ga go selo kgahlanong le Bokatoliki, le ge ke sa dumele ka go bjona. Ke nna Moprottestant ka maatla. Yeo ke nnete tlwa. O ka netefatša ga ba... O ka se ngangišane le bona. Ba re, “Ga re kgathale se Beibebe e se bolelago. Re tseba se kereke e se bolelago.”

¹⁹⁵ Modimo o ka go Lentšu la Gagwe. [Ngwanešu Branham o kokota godimo ga phuluphithi makga a mahlano—Mor.] Moo ke mo Modimo a lego.

¹⁹⁶ Eupša ba bangwe ba Makatoliki, ba kgomarela kerekeng ya bona, ba tla go dira gore o lewe ke dihlong ka bowena, bjalo ka Maprotestant. Ge feela o ka kgomarela go Beibele, ge ba kgomarela go kereke ya bona. Nnete. Eupša, ba fošitše. Nka bolela seo ka tlase ga maatlataolo a Ramaatlakamoka Modimo, gore, ba fošitše. Ka nnete.

¹⁹⁷ Gomme lena Maprotestant le phošo, ka tsela ye le dirago, gobane ka kgonthe le tseba bokaone, gomme le a e dira. Seo se dira moikaketši go tšwa go lena. Nnete, ke tšhwahlelo; dikereke di hlaphiša. Gomme bjale sebakeng sa . . .

¹⁹⁸ Kereke, e leka go dira kereke ye botse, ba aga kereke ye kgolokgolo, ba bea dintlhohlo tše kgolo godimo ga yona, diokene tše kgolo tša phaephe, le go dira se sengwe le se sengwe go leka go ekiša boka kereke ya Katoliki. [Ngwanešu Branham o kokota phuluphithing makga a mmalwa—Mor.] Ga le nyake go ekiša go swana le kereke ya Katoliki, ge e eba e lahlilwe go ya ditshenyegong. Ka gore, seo ke O RIALO MORENA, o lahlilwe go ya ditshenyegong. Gomme o ekiša ka morago ga gagwe, o ya le yena.

¹⁹⁹ Eupša se re se hlokago lehono (ga se kereke ye kgolo, sebolelwā se segolo) ke dialetara tša fešene ya kgale moo dibe di tšhumilwego, ka tlase ga dithapelo tša boikgafo go tloga go banna le basadi ba ba ratago Morena Jesu Kriste. Le tseba seo. Seo ke se re se hlokago. Nkweng, bagwera. Nkweng. Ke lerato.

²⁰⁰ Nako ya ka e ile. Ke tla no rata go sesella go seo, moo, feela, ke tla e topa, feela moragorago gannyane, tšhwahlelo yela, moo e ilego. E šwahletšwe. E šwahletše ditšhaba tša renā. E šwahletše United States.

²⁰¹ Bjale elelwang, ga se nke ka ke ka lahlela bouto bophelong bja ka; le a bona, bjale, seo ga se selo go ikgantšha ka sona; tše ke ditokelo tša tswalo tša ka tša Amerika ge ke nyaka go e dira. Eupša ke nagana kudu ka bagwera ba ka, go ba bea ka fale. Lebelelang, ke ba bone ba eya ka gare bjalo ka banna ba bakaone, ba tšwela ntle bjalo ka baradia, gomme ga ke nyake seo.

²⁰² Ke na le selo se tee. Ke mo go agela Motho yo motee sefala Yo e lego Nkgetheng, gomme yoo ke Jesu Kriste, gomme Yena a nnoši. Ke fa nako ya ka bakeng sa Gagwe. Yeo ke nnete. Gomme ge nka kgona go dira kereke e otollolle ntle, lefase ka moka le tla itlhokomela ka bolona. Yeo ke nnete.

²⁰³ Eupša anke ke le botše, ge Mna. Roosevelt . . . Monna o hwile. Anke a khutše; ke a tshepa o gona. Ba tla ka gare, gomme ba swara mabaka a mararo goba a mane, gomme ba thopa, feela bobušanoši bja makgoladitsela. Nka netefatša go lena, gore ka Lengwalong, moo Leo le rilego e tla direga. Yeo ke nnete. Ga re sa na le molaotheo gape. O ripagane ka diripana. Se sengwe le se

sengwe se rathagantšwe. Marepublican a no ba a mabe. Ke tshela ya e tee, le seripa sa tasene ya ye nngwe.

²⁰⁴ Ka gore, mmušo wo mongwe le wo mongwe o ya go tlapiriganywa, eupša Mmušo wa Jesu Kriste o tla ema le go rena go ya go ile. Yeo ke nnete. Godimo... Daniele o bone Leswika le matlolwa go tšwa dithabeng, le go itia lefase la dipolitiki morago kua le go le šilaganya go ba lerole la go šilagana ka mokgwa woo, go swana le korong ka seboeng sa nako ya selemo. Eupša Leswika lela le goletše ka go thaba ye kgolo yeo e bego e phatlalala godimo ga lego-... tletše magodimo ka moka le lefase. Yeo ke yona.

²⁰⁵ Lefase la dipolitiki le ile. Setšhaba sa rena se robegile. Le elelwa seo, gore Ngwanešu Branham o boletše seo, O RIALO MORENA. Setšhaba sa rena se gobogile. Se ka se tsoge sa tsoga. O ile, boka ditšhaba tšohle ka moka. Ke setšhaba se segologolo ka lefaseng, se eme lehono, eupša ke yona peu ya diabolo e bjjetšwe ka dipelong tša batho; ka fao e tlagoo ka Hollywood, ka fao e ilego ntle ka go batho, le go thoma go ye. Gomme o ka se ba botše selo.

²⁰⁶ Hwetša Mopresidente godimo fale yo a tla lekago go tswalela wisiki, bjale le go ba le go iletša, bonang se se tla diregago. O tla thunywa, mo diiring tše pedi ka morago ga ge a tsene ka fale. Nnete, a ka se kgone go e emela; lefase ka moka le kgahlanong le yena. Ee, mohlomphegi. O ka se kgone go e dira.

²⁰⁷ O ile. O šwahlętšwe, gomme moya wa bokomonisi o thopile.

²⁰⁸ Eyang dikolong tša rena lehono, lebelelang bana ba rena ba sekolo. Baisa ba rena ba bannyane bao ba yago sekolong, le no swanela go tseba se se diregago. Basetsana ba bannyane tlase fa ka dikolong, le dilo boka tše, ka bogolo bja lesomenne le lesometlhano, mmago bona o ba rometše sekolong, ba tlhekgemane maitshwaro, monaganong, bagwera ba diokobatši, makgoba a diokobatši, bakgogi ba sekerete, se sengwe le se sengwe gape ka mokgwa woo; ka go lebaka le lennyane la nthatana, bana ba bannyane ka mokgwa woo. Go tla ba bothata go hwetša kgarebe magareng ga ba bangwe ba bona bjalo ka ge go tla ba go hwetša nalete ka gare ga mokgobo wa bjang, ge ba na le dipeelano tša mapai le bašemane, gomme ba thosaletše mabopong a a noka le mogohle gape.

²⁰⁹ Gomme nka kgona go e netefatša go lena, bagwera ba ka. [Ngwanešu Branham o kokota godimo ga phuluphithi makga a mararo—Mor.] Nka se e bolele ka phuluphithing ntle le ge ke tseba se ke boleLAGO ka sona. Ya dikolo thwi mo ka go tša rena—tša rena dinagana, thwi ka mo ka go dinagana tše, tša bahumagadi bale ba bannyane ba apara, ga ba tsebe... ba botša bomme ba bona gore ba ya mafelong a go fapano, le go kopana le bašemane le ebile go gweba ka mmele mekgotheng ya Louisville (Ke eng?), le go opela ka dikhwaereng.

²¹⁰ Gobane, ba ne Ebangedi ye nnyane ya kgale ya leago e eme fale, moo bareri ba emego le go bolela ka dilo tše dinnyane tša

lefeela, le dikanegelo tše dinnyane nthatana tša Beibele, goba se sengwe boka seo, sebakeng sa go rera tshokologo le go tliša banna le basadi aletareng.

²¹¹ Tatagwe o sepelela ka gare bošego gomme a gotetša sikara sa gagwe, a tše galase ya piri, gomme a dula fase gomme a e nwa. Mme o ka ntle, go kgabola nako ya mosegare, le sehlopha sa basadi ka go phathi tsoko ya dikarata, ba bangwe ba leago ka mokgwa woo. O ka letela bjang ngwana go ba e ka ba eng gape?

²¹² Lebelelang, e ka ba efe tikologo ye o phelago ka go yona, seo ke se o logo.

²¹³ O tše mosetsana yo monnyane wa nthatana, mošemane yo monnyane wa nthatana, wa ba bea ntle mo, wa ba dira ba phele le yo mongwe. O tše monna, nka kgona go tše mošemane wa ka, anke a be ntle bakeng sa letšatši le yo mongwe; anke ke tsene, ka mehla ke kgona go le botša o be a na le mang. Ka nnete. Šetšang, tikologo yela, moyo wola o a mo swara.

²¹⁴ O ya ka kerekeng, moo batho bohole . . . le ya ka go dikereke tša Moya wo Mokgethwa, goba—goba dikereke tša Pentecostal, ba e bitša. Anke yo mongwe le yo mongwe a be . . . Oo, ba kitimile le go hlotholela hlogo ya bona morago le pele, modiša o a dira; šetšang kereke ka moka e thoma go dira selo sa go swana. Anke banna, batho, ba emelele gomme—gomme ba no ya pele go šiiša, goba se sengwe gape; šetšang selo ka moka se dira seo. Tsena ka lefelong moo modiša ka kgontha a logo kgokgorothwana le tonyi; šetša sehlopha ka moka se e dira. O tla ka tikologong yeo.

²¹⁵ O tše monna yo e logo monna yo mokaone wa maitshwaro, gomme wa mo tlogela a nyala mosadi yo monnyane wa go tšofala yo a sego a swanela thoro ya šeleng; ga se botelele go fihla a se a swanela thoro ya šeleng le yena. Seo ke se se diregilego go Ahaba. Tše sa go swana, pele le morago, dira mosadi yo mokaone yo monnyane a nyale monna wa mokgalabje yo a sego a swanela thoro ya šeleng; selo sa pele le a tseba, o dira selo sa go swana a logo.

²¹⁶ Ka fao nka kgona go ya, mosong wo, le go šupa diatla tša ka godimo ga magae a mannyane a go robega godimo le dilo tša go swana le tše, moo bomme ba bannyane ba go ratega ba tlago ka gare go papa wa setagwa, le dilo boka tše, gomme ba gopola gore ba ka kgona go dira se sengwe ka yena, gomme bjale mme ka moka le bohole ba bona ba a nwa le go ya pele. Ke tikologo.

²¹⁷ Ke eng? Ke diabolo. Ke diabolo, tšhwahlelo. O swietše ka setšhabeng se, boka tau ye e rorago. O ipeile yenamong tlase fa ka go lefelo le lekaonekaone ba bilego le lona, ka Hollywood. O rile, “Nka kgona go hwetša dimobi mo go fihla thelebišene e etla godimo, ka gona ke tla di hwetša.” Gomme o dula fase kua.

²¹⁸ Gomme batho ba kerekeng, sebakeng sa go tswalela dipontšho le go se dumelele bana ba bona go sepela, ba ba fa disente tše lesome ka Lamorena morago ga sekgalela le go ba romela tlase

kua, gore ba kgone go ba le phathi ye nnyane ya karata ya leago, ba be ntile go bonabeng le go namela go dikologa. Oo, a kgobogo. Bjale ba no bulela thelebišene gomme ba bogela tšhila yohle, tšhila ya go bola e lego gona lefaseng, godimo ga yona. Yeo ke nnete.

²¹⁹ Ga ke na le selo kgahlanong le mobi. Ga ke na le selo kgahlanong le thelebišene. Ke dilo tša go bola tše di lego godimo ga yona. Seo ke se e lego sona. Ge nkabe o e bolokile ka maitshwaro, e be e swanetše go dula boitshwaro.

²²⁰ O ka se kgone go rekiša dieta tša fešene ya kgale tša konope mo ka toropong, lehono, le gatee. Basadi ga ba di nyake. Ba nyaka menwana ya maoto go tšwa go tšona. Basadi ka moka ba a e dira. Yeo ke nnete.

²²¹ Ge o eya kerekeng, o ka se kgone go ba rekišetša bodumedi bja nako ya kgale, gobane, mosadi yo mongwe, ga a, aowa, ga a nyake selo go dira le seo. Aowa, mohlomphegi. “Ga go bohlokwa go nna go ya tlase kua. Ke no dumela, seo ke sohle se lego go yona.” Oo, ngwanešu, diabolo o a dumela, le yena. Nnete. O tla sokologa goba wa senyega.

²²² Bjale, tshwarelo; aowa, ga ke dire. Aowa, ga ke dire. Aowa, ke tseela seo morago. Ke rata batho. Eupša ke—ke—ke—ke a le rata gabotse kudu go le bona le eya ka go phonkgela ka hlogo ka mokgwa woo. Modimo ge a rata, ke tla topa ye moragorago gannyane mo bekeng.

²²³ Bjale, go lena bomme bao le lego bomme, feela lentšu go lena pele le tloga. Modimo a le šegofatše. Le godiša bana ba lena gabotse.

²²⁴ Re tla topa tšhwahlelo ye; re swanetše go ya ka malapeng go le bjalo, le mafelo a mantši, dikolong, le ntile mafelong le yona. Re tla e topa.

²²⁵ Eupša, tšhwahlelo ya United States, diabolo o e thopile. Le se boife Russia. Russia ga e na le selo go dira. Re a e dira ka borena, go bola ga rena beng thwi magareng ga rena. Seo ke therešo.

²²⁶ Le a tseba, United States e na le melato ye mentši ya tlhalo go feta lefase ka moka? Dithhalo tše ntši; naganang ka yona. Seo se a šiiša? Bomme bo robegile. Bomme ga ba dule gae gape le bana ba bona, boka ba be ba fela. Ba swanetše go ba le mošomo.

²²⁷ Fa letšatši le lengwe, monna yo itšego wa krosari ka go toropokgolo ye, o be a bolela le nna ka yona. Basadi ba ba šomago ka go dimela tše tša bohle, basadi ba baswa ba ba nyetswego ka sehlopha sa digotlane tše nnyane. Ba na le bahlokemedi ba masea ba ba hlokamelago masea a bona. Ba šoma ka mafelong a a bohle. O rile, “Go be go le ba babedi ba bona ba eme fale, ge ba lebogišitšwe mošomo, go mediro ya bona ya setšhaba, o rile, ‘Se tshwenyege. Re tla e dira, go le bjalo.’”

²²⁸ Oo, iri ye bjalo ya bommalegogwana e batametše. Kgonthe. Diabolo o ba boditše gore ke bona molaodi wa ntlo. Ba tla itirela tšhelete ya bona beng. Ba tla dira se ba ratago go se dira. Gomme le se tloša go bona, ge le ka kgona.

²²⁹ Fao go selo se tee feela se ka kgonago go e tloša go tšwa go bona, seo ke aletara, pele ga Jesu Kriste, bja fešene ya kgale, bodumedi bja noka ya dikeledi bjo bo tla thubago dipelo tša bona le go di kgeila diripana, le go ba dira se ba swanetšego go ba. Yeo ke nnete.

²³⁰ Ba ka no nagana ke no ba mouwane wa kgale. Eupša letšatši ge o ehwa, ngwanešu wa ka, kgaetšedi, o tla lemoga gore ke go boditše Thereso. Yeo ke nnete.

²³¹ O a kgatlampana, tšhwahlelo, iri e mo. Bjale, bjale, ee, iri ya sephetho, gape, iri ya sephetho; e sego go tla kerekeng, eupša iri ya sephetho ge eba o ya go hlankela Kriste goba o dule o le bolelo ka kerekeng ya gago. Gomme yeo ke nnete.

²³² Go na le maloko a mantši a kereke. Ge bohole mal... goba batho ba Amerika bao ba ipolelago go ba Bakriste, ba ka ba Bakriste ba kgonthe, Bakriste ba go tswalwa gape, ngwanešu, re tla bolokega boka le tla bago ka Legodimong, go nyakile, go tšwa dintweng le mathata, ee, mohlomphegi, malwetši a tla tlogela naga, se sengwe le se sengwe gape.

²³³ A go ka se be botse go tla go theoga mokgotha le go bona moo mohumagadi a tlago kgauswi, le monna, "Go bjang, kgaetšedi? Moso wo mobotse, ngwanešu"? Sepelela tlase, ga go na... Ga o na le go tshwenyega go tee ka lefaseng. Se sengwe le se sengwe se no ba gabotse le bothakga. Gomme moisa o tla khoneng ya mokgotha; sebakeng sa go leka go go kitimiša, o tla ema, a re, "Go lokile, ngwanešu. Go lokile, o bile... Oo, wena pele ga ka," le a bona, feela go phala... A seo se ka se makatše? [Phuthego e re, "Amene."—Mor.] Re ya go ba le yona, eupša yeo e ka go Mileniamo, ngwanešu. Letšatši le no tla. Yeo ke nnete. Kafao bjale ga re...

²³⁴ Ke eme ka boagišaneng bja rena, fa letšatši le lengwe; ga go selo kgahlanong le boagišani bja rena, eupša ke kgona go lemoga bana ba rena ba bannyane. Mosadi o be a lla. Ngaka ye e itšego ya toropo ye, mosetsana wa gagwe yo monnyane o be a kitima go dikologa le mosetsana wa ka yo monnyane, gomme ba a ratana yo motee go yo mongwe; go fihla ba hwetša gore leina la gagwe e be e le Branham, gomme o be a le ngwana wa Mor. Branham. Seo se ile sa e rarolla. Mosetsana yo monnyane o be a sa kgone go ya le mosetsana wa ka yo monnyane gape. "Nna," ka gopola, "gabotse, go lokile."

²³⁵ Ba bangwe ba baagišani ba bannyane ba kitimela godimo fale, ba rile, "Gabotse, go be go lokile." Kafao, ba ile go modiša wa bona. Le se ke la mpotša. Le a tseba, ke—ke na le tsela ya go tseba dilo tše ntši, le a bona. Kafao ba—ba ile go modiša wa

bona, gomme ba rile, "Le a tseba, go na le monna yo a dulago boagišaneng bja rena, o lokile kudu go bana ba rena." Ba rile, "Ke Mor. Branham. O a ba tsea, a ba kgobelka go theraka ya gagwe ye nnyane ya kgale, gomme a ba ntšhetša ntle."

²³⁶ O rile, "Gabotse," [Ngwanešu Branham o hlwekiša mogolo wa gagwe—Mor.] "ga re ne selo kgahlanong le Mor. Branham. O lokile, eupša, le a bona, o no ba legoro la go fapanala batho go feta se re lego." Ya. "Re, ke—ke tla rata gore le ka se be... le a tseba, nka se be mohuta wa... O bolela le bona, gomme wa ba botho, eupša e no tlogela bjoo e be bofelo."

²³⁷ Oo, ngwanešu! Mosadimogatša wa ka o be a eme fale, a lla. Ke rile, "Moratiwa, ke mothalo wa go aroganya. Ge e le nna le bantlo ya ka, re tla hlankela Morena."

²³⁸ Le ge lefase lohle le efa tsela; go le bjalo Jesu Kriste! Ge eba ke swanetše go bitšwa lehlanya, ge eba ke swanetše go šikologwa ke wa ka mol-... motho wa ka, le dilo boka tše, Ke tla no kgetha Jesu Kriste. Swarelala go seatla sa Modimo sa go se fetoge. Ge bagwera ba lefase ba go tlogela, fela o sa kgomarela kgauswiuswi le Yena. Swarelala go Yena.

²³⁹ Modimo, anke ke rere boka ga se nke ka tsoge pele. Anke ke rere go banna ba ba hwago, bjalo ka monna yo a hwago, nnamong. Anke ke rerele batho boka nka se tsoge ka ba le theroye nngwe go rera. Anke ke ba phegelele go tla aletareng, ka difahlego tša go elela ka meokgo; ba boela morago gae le go phela boka Bakriste, le go phela ka boagišaneng bja bona. Emiša nyakalalo yohle ye fa le go kitima go dikologa, le go taboga le go ya pele; le go dira ka tsela *ye*, le go foka godimo ka go *ye*, le go ya ka tsela *yela*. Oo, le se ke la dira seo. Yoo ke diabolo. Yona meboya ya matimone e tla godimo ga Bakriste.

²⁴⁰ Elelwang, badiredi bale tlase fale, ba be ba le bona baprofeta. Ba be ba le baprofeta. Ba be ba le banna ba bodumedi ba neela sehlabelo. Ba be ba no ba ba bodumedi bjalo ka barutiši ba letšatši le, eupša, ngwanešu, ba be ba le ditsela tše telele go tseba therešo.

²⁴¹ A ga le bone ka fao diabolo a lego wa bodumedi? Diabolo ga se molwa le-, selo se segolo se se bjalo ka bokomonisi, sohle kgahlanong le Bokriste. Seo ga se. Seo ke sa, oo, gabotse, sa diabolo, kgonthe, eupša ga se molwalekriste. Molwalekriste ke wa bodumedi kudu, wa bodumedi kudu. E be e le moyawa bodumedi wo o bapotšego Jesu. Ka mehla e bile lefase la bodumedi, batho ba bodumedi, ba ba bapolago. Ke batho ba bodumedi ba ba bego ba le kgahlanong le Kriste wa therešo. E be e le baporofeta ba bodumedi ba ba bego ba le kgahlanong le Mika. Ke batho ba bodumedi ba letšatši le bao ba lego kgahlanong le Molaetša wa Modimo.

²⁴² Elelwang, ke le seboditše. Ke le boditše. Ga ke bolele kudu ka Bokatoliki, le Baptist le Methodist; Ke no bolela ka batho

bao e lego batho ba bokgethwa, thwi go theoga methalo ye fa. E lebeleleng lehono, ka fao e tlilego go kgabaganya le go ema ka tiragatšo. Oo, nna. Ke tla ya ka go yona, nako ye nngwe. Gomme pelo ya ka e robega ka gare ga ka.

²⁴³ Ema godimo kua ka seletšo sa banjo ya kgale, o itia seletšo sa banjo yela ya kgale, gomme o gwedinya seletšo sa fitlele ka mokgwa woo, “A yo ke modiša wa kgomo wa Texas *Semangmang*?” Ga ke na le selo kgahlanong le monna; eupša seo ke sa ntle kua lefaseng ntle kua. Yeo ke therešo. Bokaone ke eme, ngwanešu, ebole ke se ne selo, sa aowa, ga go selo le gannyane, eupša go no ema le go phagamiša diatla tša ka le go re, “Jesu, mpoloke kgauswi sefapanong.” Ee, mohlomphegi.

Sefapano sa boikgafo ke tla se rwala,
Go fihla lehu le ntokolla,
Gona ke ya Gae go rwala korone,
Ka gore fao go korone ya ka.

²⁴⁴ Go lena bomme ba bannyanne fa mosong wo, bao le bilego bomme ba kgonthe, gomme ke a tseba go na le bontši bja lena; Ke a nagana, yo mongwe le yo mongwe wa lena. A ke le botšeng se sengwe. Modimo a le šegofatše. Le Ebangedi ya bohlano, ke a nagana. Anke ke le botše se bjale bakeng sa bana ba lena, feela selo se sennyane. Gobane, Ngwanešu Neville ka kgonagalo o tla rera ka . . . ka ga mme bošegong bjo, goba e ka ba mang, yo mongwe wa rena yoo a rerago, go lokile, ka ga mme. Eupša, theeletšang, anke ke le kgopele se sengwe.

²⁴⁵ Elelwang, ge Moshe e be e le mošemanne yo monnyane, e be e le mme yo a mo filego taelo ya gagwe. E be e le mme wa bomodimo yo a tšerego Moshe yo monnyane matolong a gagwe, gomme o rile, “Moshe,” o mo rutile tšohle. O be a le morutiši wa gagwe, goba, o be a le morutiši wa gagwe, a ke re, ka tlase ga Farao, gomme o rile, “Bjale, dilo tše,” o rile, “Moshe, letšatši le lengwe o ya go lokolla bana ba Israele. Wena o mošemanne yo a biditšwego. Ipoloke wenamong go sekä le go se be le sepatsa go tloga go lefase, gobane ke wena yena. Ke wena yena.”

²⁴⁶ Ga go lefelo le lengwe re le tsebago, moo a kilego a ya seminaring ye itšego, thuto ye itšego le gannyane, a kilego a e hwetša. O dutše thwi ka paleising ya Farao, e bego e le mohetene; eupša mmagwe o mo rutile. [Ngwanešu Branham o kokota godimo ga phuluphithi makga a mararo—Mor.] Yoo ke mme wa kgonthe. O mo rutile melawana ya Morena. O mmoditše ka fao a swanetšego go ba yo mokgethwa. O mmoditše ka fao le se a swanetšego go phela, le ka fao, se Modimo a swanetšego go se dira, se a tla mo direlago. Gomme e kgomaretše Moshe matšatši ohle a bophelo bja gagwe.

²⁴⁷ Gomme yo mongwe le yo mongwe wa go loka, wa therešo, mme wa go botega yo a tla tšeago masea a gagwe a mannyane, sebakeng sa go ba romela go dipontšho tša diswantšho le ditansi,

le go ya pele ka mokgwa woo, gomme o tla ba Bea difarong tša gagwe le go ba ruta ka Morena Jesu Kriste.

²⁴⁸ Mo letšatši le lengwe, ke be ke bolela le mme mogaleng. Gomme mme o rile, “Oo, Ngwanešu Billy,” o rile, “mošemane wa ka wa go šokiša o bothateng.” O rile, “Oo, a bothata a lego ka go bjona.”

²⁴⁹ Ke rile, “Ee, ke tseba ka yona, kgaetšedi, morategi.” Gomme o rile, “A ka no ba phošo. Ga ke tsebe.” O rile, “Yo mongwe o bolela se gomme yo mongwe o bolela *sela*. Ga ke tsebe. Eupša,” o rile, “ga go kgathale ge eba o phošo goba o lokile, ke a mo rata.” Ke lena bao, “Ke a mo rata.”

²⁵⁰ O rile go mmagwe, o rile, “Ke forilwe ke *se* le *sela*.” O rile, “Mme, ke a dumela o ka ba moratiwa a nnoši ka kgontha ke nago; mosadi yo a botegilego go nna, gomme a nkgoramelago.” Leo ke lerato la mme. Yoo ke mme wa kgontha yoo a tla beago matsogo a gagwe go dikologa lesea la gagwe. Go sa kgathale ge eba o nepile goba phošo, o ya pele thwi go kgabola. Gomme ge Modimo . . . Ge mme a ka kgona go nagana seo ka lesea la gagwe, go kaakang bontši kudu Modimo a tla naganago seo ka la Gagwe. Le a bona? Le dula thwi le Yena. Eyang gabotse.

²⁵¹ Gomme bjale a ke no le botša mme yo mongwe, thwi ka pela, ka Beibeleng, pele re tswalela. Go be go le mme a bitšwa Herodia. O rutile morwedi wa gagwe go tansa. O be a mo nyaka go tsebalega. Gomme o binne pele ga kgosi, gomme o nyakile hlogo ya Johane Mokolobetši. Re na le bohlatse bja tše masomešupa tša ditholwana tša gagwe, mothepana yo yoo a binnego pele (morwedi wa Herodia), a binnego pele ga Herode; ba masomešupa ba bana ba gagwe, e ka ba ba hwile bommategogwana goba thapong ya lehu.

²⁵² Mme yo motee o mo rutile dilo tša lefase; mme yo mongwe o mo rutile dilo tša Modimo. Yo motee o bile moetapele yo mogolo le mofenyi, ga a hwe magareng ga batho lehono; gomme yo mongwe o gobošitšwe gomme o ka heleng, gomme o tšere dikete atiša ka dikete le yena. Le bona se ke se rago? “Godiša ngwana ka tsela ye a swanetšego go ya.”

²⁵³ Gomme ka kgontha ke le kwelabohloko lena bomme ba go šokiša le dutšego fa ka dirosa tša lena tše tšhweu. Go na le Legodimo leo mme a ilego go lona, lehono, moo mme wa fešene ya kgale yo a pheletšego Modimo, go molaleng o fetetše ka kua ga seširo. O go letile go tla. Yeo ke mnete.

²⁵⁴ Ke hlompha le go le hlompha fao ka dirosa tša lena tše khubedu. Mmago, ge o nyaka go mo direla e ka ba eng, e dire matšatši a makgolotharo le masometshela tlhano ka ngwaga. Eya ntlong ya gagwe gomme o neele thapelo, gomme o phelele Modimo. Seo ke selo se o swanetšego go se dira. Gomme godiša bana ba gago. Gomme ge bana ba gago ba gola, ba tla go bitša “mošegofatšwa,” ka morago ga ge o fetetše pele bokagodimo ga

seširo. Woo ke moya wa kgonthe wa bomme, moya wa kgonthe wa letšatši la mme. Letšatši la bomme ke matšatši a makgolotharo le masometshela tlhano ka ngwaga.

²⁵⁵ Le ke letšatši le ba rekišago matšoba le go feta, lefase le a dira. Ge go feta, ge lefase le ka ema mengwaga ye mengwe ye masomepedi, ba tla ba le matšatši a morwa, matšatši a morwedi, le, matšatši a motswala, le matšatši a malome, le tšona dilo tšohle boka tše, feela go lekanela go tliša lefase ka go matsaka a kgwebo. Moo e no ba moo e yago, thwi ka heleng, feela ka maatla ka moo e kgonago go ya, go tshenyego.

Eupša, wena, Modimo a go šegofatše, ke thapelo ya ka. A re ka rapela.

²⁵⁶ Tate wa rena wa Legodimong wa go loka, ge re lebelela morago, mosong wo, ka menagano ya rena, morago tlase mošola, mengwaga tsoko ye makgolo ya go feta, ge go be go eme Josafate a eme kua lehlakoreng la Kgoši Ahaba. Gomme Moya wo monnyane tlase ka pelong ya gagwe, o sa šetše wa Modimo, le ge a dirile phošo, o mmoditše, o rile, “Ye ke phošo. Ye ke phošo. Ga se ya hlweka. Ga se ye kgethwa. Moporfeta o boletše dilo tše di ka se kgone go ya pele ka mokgwa wo.” Gomme Mollo wo monnyane wa Modimo wa mo phafoša.

²⁵⁷ Gomme ka gona O be o na le yo mongwe go araba Mollo wo monnyane wola, e bego e le Mika, moporfeta wa therešo wa Modimo. Le ge a ka be a tlide godimo kua a apere mankgeretla, le ge a ka be a tlide godimo kua a nyatšiwa, gomme bona bohole ba lebeletše godimo ga gagwe mo o ka rego sehlopha sa diphiri se lebeletše kwana. Eupša o boletše therešo, le ge a ile a swanela go bethwa mo sefahlegong, le ge a ile a swanela go lahlelwaa ka kgolegong gomme a fepša ka borotho le meetse a mahloko. Eupša, go le bjalo, mantšu a a boletšego a tla go phethega, ka gore O be o na le yena.

²⁵⁸ Modimo, efa, lehono, gomme re lebelela fase ka Beibeleng ye. Re lebelela dipuku tša kereke, dipolao, le go ya pele, tša dikereke, ditirelo, le go bona ka fao ba dirago *se, seo*, goba se *sengwe*. Eupša a re lebeleleng ka go Lentšu le la therešo fa, gomme re bone se Le se bolelagoo: “Ntle le bokgethwa, ga go motho a tla bonago Morena. Latela khutšo le bokgethwa, bjo, ntle le, ga go motho a tla bonago Morena. Yo a ratago lefase, goba dilo tša lefase, lerato la Modimo ga le ka go yena.”

²⁵⁹ “Ka matšatšing a mafelelo dinako tše thata di tla tla. Batho e tla ba baithati ba bona beng, baikgogomoši, baikgantšhi.” Oo, dilo tše kgolo tše, Morena, tše di diregago. “Ba hlogothata, ba menagano megolo, barati ba maipshino go feta barati ba Modimo; ba ruta batho melawana ya—ya batho sebakeng sa ditaelo tša Modimo; ba na le sebopego sa bomodimo, gomme ba gana maatla a Moya wo Mokgethwa” go dira motho go tlatšwa ka Moya, go mo dira a hlalale, go dira meokgo go elela mahlong

a gagwe, go mo dira a ye ntle le go rapelela balwetši, go mo dira a bolele ka maleme le go hlatholla, go mo dira a profete. Moya wa Modimo, Modimo yo a phelago, ba nno O tloša ka go lefelo la marobalo goba se sengwe boka seo, “Ba na le sebopego sa bomodimo, gomme ba gana Maatla a bjona.”

²⁶⁰ O Modimo, anke batheeletši ba bannyane ba, mo letšatšing le, ba phafoge ka pela, gonabjale, pele ga nako ya bofelo e etla, le go re swara ka go seemo se. Anke re be, re mpshafatše ka borena, bjalo ka ge Beibebe e rile, “Tsoga gomme o itšikinye ka bowena. Le go kgopela tsela ya kgale, e lego tsela ye botse, gomme ge o e hwetša, sepela ka go yona.” Modimo, efa gore re kgone go hwetša tsela ya kgale ya makgwakgwa, ge re ka kgona go ema mmogo gape, bjalo ka makgolo, gpmme ra tšoena diatla tša rena mmogo le go opela.

Ke tla tšea tsela le banyatšiwa ba se nene ba
Morena.

Ke thomile ka gare le Jesu gomme ke ya go
kgabola.

Modimo, re thuše go phela seo le go ba seo.

²⁶¹ Šegofatša bohle bomme ba ba go ratega ba dutšego mo, Morena; go tseba gore ke bomme, bonabeng, ka dirosa tše tšhweu di thobetšwe godimo ga dijase tša bona, mosong wo, bjalo ka segopotšo sa mme morategi wa kgale yo a fetetšego mošola wa lefelotiragalo. O Mong wa Bophelo, ba šegofatše, Morena. Gomme anke ba šegofatšwe, le bona, gomme anke megopolu ya bana ba bona e be bjalo ka ya bona e na le mmagobona, ge a ile bokagodimo ga seširo, go ya Legodimong la letago. E fe, Morena.

²⁶² Gomme mosong wo mongwe ge bophelo bo tswalelelwka kgole go tloga ditšhikeng tša rena, gomme mohemo wa rena o šitwa go tla go rena, seširo se tla bulega morago; o tla tla fase, mohlomongwe, go fihla bofelong bja Jorodane, go re thuše go tshela. Oo, go letšatši lela la letago ge re gata maoto a rena godimo mošola, moo go ka se bego... Moya o ka se tšhilafatšwe ke muši wa sekerete. Fao go ka se tsoge go bile letagwa mokgotheng. Fao go ka se tsoge gwa ba mmalegogwana. Fao go ka se tsoge gwa ba sebe. Fao go ka se tsoge gwa ba selo sa go swana le seo. Eupša, ka go letago go ya go ile, re tla phela ka khutšo le Morena wa rena Jesu Kriste le bana ba rena. Gomme, oo, a letšatši la go makatša.

²⁶³ O Tate, ge leswiswi le legolo le sa le godimo, ntwa, gomme diabolo o šwahlela dinaga, le go šwahlela diphuluphithi, go šwahlela dikereke, go šwahlela batho, go šwahlela dikgwebo, go šwahlela ditoropokgolo, le dikolo le magae; O Modimo, re thuše go ema, go goga tšoša ka pela le go lwela Modimo, bjalo ka ge Moshe le—le Balefi ba dirile tlase kua ge sebe se be se le ka kampeng. Re thuše, Morena.

²⁶⁴ Re lebalele bjale, gomme re šegofatše. Gomme re boloke re kokobetše, re ripaganye, Morena. O Modimo, O rile, “Yo a yago pele, a bjala ka megokgo, ntle le pelaelo o tla bowa gape, a hlalala, a tliša dingata le yena.” O Modimo, re ripaganye ka diripana. Re kgoloke, ka boswa, Morena. Re tšwela ka ntle ga tsela kudu.

²⁶⁵ Ke nna, nnamong, Morena, ke fihla lefelong moo ke naganago ka ga ke ba bakae ba tla tlago kopanong ya ka. O Modimo, ke nyaka O tsene. Etla, Morena! O Kriste, etla Morena! Nthipaganye; nkogoloke godimo. O Morena, o se ke, o se tsoge wa ntesa ka bea dilo tseo godimo ga monagano wa ka. Modimo, di tloše go tloga go nna.

²⁶⁶ Nthuše, Morena, go rera, bjalo ka ge ke boletše, nakwana ya go feta, go swana le monna yo a hwago go banna ba ba hwago, go tseba gore ka moka re swanetše go lebanya Bokagosafelego. Re swanetše go ema pele ga Gago; ge O se ka mokgwa wa Gago wa go thabiša, ge O se ne kgaogelo, ge O eme ntle le kgaogelo; ge O eme, o befetšwe, go tliša kahlolo godimo ga ditšhaba le batho ba ba gannwego gomme ba ganne lerato la Ngwana wa Gago.

²⁶⁷ Modimo, mphe kgaogelo le Yena lehono, gore ka Letšatši leo ke tla kgonas go ema ke netefaleditšwe. Le ka no swanelas go lla bjale, eupša O tla le phumula go tloga, go ya thabong, ka nako yeo, ge O re, “Tsenang ka mathabong a Morena, ao a lokišeditšwego lena go tloga motheong wa lefase.” Modimo, eba le rena bjale, gomme re thuše, re a rapela, Leineng la Jesu. Amene.



TŠWAHLELO YA UNITED STATES NST54-0509
(The Invasion Of The United States)

Molaetša wo ka Ngwanešu William Marrion Branham, setlogong o abilwe ka Seisimane mo Letšatšing la Mme, Lamorena mosong, Mei 9, 1954, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org